



藏書紀事詩卷四

長洲葉昌熾



好書盡職奉

綸音朱邸牙籤枕玉琴河閒東平無愧色豈惟博物邁甄琛

怡親王 果恭親王 成親王

陸心源宋槧婺州九經跋怡賢親王收藏王爲 聖

祖仁皇帝之子其藏書之所曰樂善堂大樓九楹積書皆

滿絳雲樓未火以前其宋元精本大半爲毛子晉錢遵王

所得毛錢兩家散出半歸徐健庵季滄葦徐季之書由何

義門介紹歸於怡府乾隆中 四庫館開天下藏書家皆

進呈惟怡府之書未進其中爲世所罕見者甚多如施注

蘇詩全本有二此外可知矣怡府之書藏之百餘年至端  
華以狂悖誅而其書始散落人間聊城楊學士紹和常熟  
翁叔平尙書吳縣潘文勤錢唐宋修伯宗丞得之爲多昌  
熾案怡府藏書始自怡賢親王之子名弘曉余聞之盛伯  
希祭酒云存齋所言攷之未詳也 怡親王明善堂詩集  
張純熙序親王冰玉主人至性夙深忠勤體國平居積學  
好古凡經史傳記以及諸子百家之編靡不探其深蹟得  
其高朗 又伊都立序冰玉主人殿下天姿高華澄心墳  
素士安之萬卷咸披應奉之五行俱下方斯蔑如也 嘯  
亭雜錄果恭王諱弘瞻 憲廟第七子也嗣果毅王

後善詩詞幼受業於沈懋士尙書故詞歸正音不爲凡響

昌熾謹案嗣王允禮亦工詞翰著自得園文鈔 又成親  
王諱牙理爲 純廟第十一子善書法士大夫得片  
紙隻字重若珍寶 成親王詒晉齋集家有書積漸多矣  
以經史子集次其目題以長句錦軸牙籤富自誇深居也  
說積書家空巢未肯從東野拈買猶須歎浣花檢處熒熒  
銀燭短收時故故玉琴斜甄琛博物伊何有政可慙人惠  
子車 李文藻琉璃廠書肆記寶名堂周氏購得果親王  
府書二千餘套列架而陳之其書裝潢精麗俱鈐圖記  
平津館鑒藏書籍記元板春秋纂例孫退谷藏書有果親  
王府圖籍朱文方印果親王點定朱文長印元板南史有  
果親王府圖書記朱文長印 昌熾案怡府藏書之印曰

怡府世寶曰安樂堂藏書記曰明善堂覽書畫印記明善堂集卷端有御題明善堂印御題銀潢派

裏圭璋器

天語盡職從知忠盡切

編音好

書猶見性情醇怡親王寶忠孝爲藩諸朱記成邸藏書余所見宋本夢溪筆談有皇十一子詒晉齋印朱記又宋刻溫公書儀有永理私印皇子永理之印朱記

絳雲未逐劫灰紅江左圖書日正中一自新宮三日哭閒繙

貝葉唱宗風

錢謙益受之

曹溶絳雲樓書目題詞虞山宗伯生神廟盛時早歲科名交游滿天下盡得劉子威錢功父楊五川趙汝師四家書更不惜重貲購古本書買奔赴捆載無虛日用是所積充

物幾埒內府視葉文莊吳文定及西亭王孫或過之中年構拂水山房鑿壁爲架度其中晚歲居紅豆山莊出所藏書重加繕治區分類聚栖絳雲樓上大櫝七十有三顧之自喜曰我晚而貧書則可云富矣甫十餘日其幼女中夜與乳媪嬉樓上翦燭炷落紙堆中遂燧宗伯樓下驚起燄已張天不及救倉皇出走俄頃樓與書俱盡余聞駭甚特過唁之謂余曰古書不存矣宗伯每一部書能言舊刻若何新板若何中間差別幾何驗之纖悉不爽蓋於書無不讀去他人徒好書束高閣者遠甚然大偏性未爲深愛古人者有二端一所收必宋元板不取近人所刻及鈔本雖蘇子美葉石林三沈集等以非舊刻不入目錄中一好自

矜嗇傲他氏以所不及片楮不肯借出儘有單行之本燼  
後不復見於人間余深以爲鑒戒 天祿琳琅宋本漢書  
錢謙益跋甲申之亂古今書史圖籍一大劫也吾家庚寅  
之火江左書史圖籍一小劫也今吳中一二藏書家零星  
摺摭不足當吾家一毛片羽見者誇詡比於西陽羽陵書  
生餓眼但見錢在紙裏中可爲捧腹 人海記錢蒙叟撰  
明史二百五十卷辛卯九月晦甫畢越後日絳雲樓火作  
見朱人無數出入煙燄中隻字不存昌熾案絳雲災在庚  
寅查云辛卯誤也 橋西雜記顧黃公言虞山當絳雲樓  
火時親見有緋衣者指揮烈燄上乃大叫曰天能燒我屋  
內書不能燒我腹內書指其所撰國史也 牧翁賴古堂

文選序己丑之春余釋南囚歸里盡發本朝藏書哀輯史  
乘得數百帙選次古文得六十餘帙忘食廢寢窮歲月而  
告成庚寅孟冬不戒於火爲新宮三日之哭知天之不假  
我以斯文也息心栖神皈依內典世間文字眇然如塵沙  
積劫矣 又與王阮亭書衰遲潦倒賣身空門舊學無幾  
遺忘殆盡惟有日繙貝葉銷閒送老云云見古夫于亭雜  
錄 昌熾案牧翁紅豆山莊在虞山之拂水巖然考有學  
集題李長蘅畫扇冊後亦署碧梧紅豆村莊又有燕譽堂  
雲上軒榮木樓並見讀書敏求記宋本漢書跋末云癸未  
中秋書於半野堂海虞瞿氏所藏宋史有牧翁題字云庚  
寅十月初二夜半野堂火片刻灰燼據此則絳雲樓下卽

半野堂所在矣一號蒙叟其題易箋云余再蒙大難思文  
明柔順之義自名為蒙叟又號東澗其遵王四子字序云  
頃者吉州施偉長謁臨海先廟觀周成王饗彭祖三事鼎  
二足篆東澗二字蓋周家卜洛時款識也余老耄不忘先  
烈遂自號東澗遺老其題介立詩又署峨嵋老衲徹修為  
太學生約之翁君作墓表又題石渠舊史其藏書一印曰  
如來真子天子門生士禮居藏書題跋記陽春白雪惠香  
閣物惠香閣柳如是所居卷中有牧翁印有惜玉憐香一  
印

東澗方羊如海若述古猶能得什三羣從翩翩雖嗜古執圭  
僅許視諸男

錢謙貞履之  
孫興祖孝修

子孫保求赤

孫艾頤仲

族

錢受之述古堂宋刻書跋辛丑暮春過遵王述古堂觀宋  
刻書縹青界朱裝潢精緻殆可當我絳雲之什三 又錢  
令人趙氏墓誌銘我曾王父體仁生五子長為我王父順  
時仲山東副使諱順德副使仲子世顯生謙貞謙貞生孫  
保孫保娶趙文毅用賢之曾孫女太子中允士春之女也  
又列朝詩傳謙貞字履之初失祖父母徐守節自誓先  
君翼而長之故履之雖從祖弟猶吾弟也早謝舉子業闢  
懷古堂以奉母簾戶靜深書籤錯列年五十餘遭世亂坎  
壈不得志卒其孤孫保能讀父書 愛日精廬藏書志李  
羣玉唐風集皆有錢履之讀書記板心有竹深堂三字昌  
熾案竹深謙貞七世祖洪自號也錢陸燦常熟縣志洪字

理平與兄寬字理容世家奚浦能詩好客洪愛種竹堂曰  
竹深處寬號柳溪列朝詩傳府君有竹深遺稿藏於家  
天祿琳琅孔子家語有錢求赤讀書記彭城匪庵諸印祥  
符周季貺云求赤校讎精審日讀書夜必記於卷尾曰某  
日讀若干頁某日起某日竟其勤如此所評明代詩文曰  
匪庵選本 昌熾案馮舒懷舊集履之次子孫艾字頤仲  
年僅二十卒頤仲亦喜誦讀每與人通假鈔錄朱黃兩毫  
不去手篆刻似文彭懷舊集有頤仲次韻求赤家兄詩又  
案求赤一名容保余所見藏書皆有錢孫保一名容保方  
印 海虞詩苑錢興祖字孝修號幔亭久館京師晚歷邊  
徼年踰五十以客死 又錢興國字孝標一名炳字壘山

幔亭之弟也 鐵琴銅劍樓書目六韜錢孝修從宋本影  
鈔孝修遵王從子昌熾案孝修一名純余所見明刻山谷  
外集注有虞山錢純孝修氏原名興祖朱記又案錢氏諸  
子又有錢天保字羽王見賞於宗老東澗見海虞詩苑瞿  
目陸宣公集求赤孝修遞相藏弄皆有名印又有錢孫臨  
一印鴻蒙一印孫臨當亦其昆弟行而鴻蒙其字也求赤  
藏書處曰懷古堂卽履之築以奉母者孝修曰在茲閣瞿  
氏所藏十六國春秋爲其家藏板心有此三字

張鐙高宴白門秋費盡黃金與翠裘麪肆酒坊論秤買蠟車  
障壁雜泥髹 錢裔肅嗣美 子曾遵王 孫沅楚殷

錢受之族孫嗣美墓誌銘從孫嗣美好聚書書賈多挾策

潛往余心喜其同癖又頗嫌其分吾好也天啟閒官吏局  
與中州王損仲商訂宋史損仲言王侑東都事略藏李少  
卿家搜篋中獲之繕寫以歸人言嗣美家有宋刻善本而  
未信也辛丑從其子曾見之刻畫精好闕文具在則其捐  
館舍已十有六年矣嗟乎以余之於斯文窮年盡氣搜討  
不可謂不力而宋代遺文頡頏長編者近在家門而不克  
知余之闕漏謏聞良可以自愧然王侑之書僅存於蠟車  
障壁人不能舉其名氏是子也顧獨能知而藏之藏之之  
久至身代銷沈之後而余乃始徬徨展玩伫想於斯人則  
古人所謂家有名士三十年而不知者固未可謂之晚也  
嗣美名裔肅萬曆乙卯以春秋舉順天卒於丙戌歲之十

月年五十有八子四人長召亦舉於鄉次名次曾次魯曾  
好學藏書益富 遵王述古堂藏書自序余二十年食不  
重味衣不完采摒當家資悉藏典籍中如蟲之負版鼠之  
搬薑甲乙部居粗有條理憶年驅雀時從先生長者游得  
聞其緒論逮壯有志藏弄始次第訪求問津知塗幸免於  
冥行摘埴然生平所嗜宋槧本爲最馮定遠每戲予曰昔  
人佞佛子佞宋刻乎相與一笑而不能已於佞也世閒聚  
散何常百六鷗回絳雲一燼圖史之厄等於秦灰今吾家  
所藏不過一毛片羽焉知他年不爲有力者捆載而去抑  
或散於麪肆酒坊論秤而盡俱未可料總之不值達人之  
一晒耳 又寒食夜夢牧翁詩絳雲脈望收燼餘緗帙縹

囊喜充物盡說傳書與仲宣只記將車呼子慎自注云絳雲一燼之後所存書籍大半皆趙元度脈望館校藏舊本公悉舉以相贈 吳焯敏求記跋錢遵王此書成局置篋中出入每自攜靈蹤微露竹垞謀之甚力終不可見後典試江左遵王會於白下竹垞故令客置酒高譙約遵王與偕私以黃金翠裘予傳書小史啟鐫預置楷書生數十於密室半宵寫成而仍返之 鐵琴銅劍樓書目宋婺本尙書十三卷吾邑錢楚殷藏本楚殷名沆遵王子也卷首鈐一圓印云傳家一卷帝王書其珍重如此昌熾案牧翁遵王四子字序曰東夏字思祚東鎮字思烈東漢字思光東表字思勳無名沆 侯攷遵王藏書處曰也是園曰述古

堂攷陳繼儒妮古錄繆貞得宋紹興丁巳邵諤所進述古圖研因以述古名堂黃晉卿爲記是述古之名不始於遵王也又案士禮居藏書題跋記漢天師世家華陽顧氏本有虞山錢曾遵王莪匪樓藏書十一小字其跋西溪叢語自題貫花道人蕘翁謂取龍龕手鑑序穿貫綫之花語意江左征塵動鼓鞞百千紙甲爛如泥亦如陰火銷磨盡丹點煤痕滿駃騠 陳宏緒士業

先正事略陳士業名宏緒號石莊父道亨明兵部尙書士業性警敏家集書萬卷晝夜講肄以任子薦授晉州牧謫湖州經歷有石莊集恆山存橐寒衣集 石莊集續書日記余以壬戌作酉陽山房藏書記今十五載矣壬戌以前

舟楫與馬無虛歲所至輒汲汲以訪求典籍爲首務在長  
安四閱月時閣部院寺暨諸司新志告成余念實錄之所  
未及會典之所未詳者畢載此書一代之制度條教備焉  
屬友人遍覓之僅得吏部太常二志其後四載舍弟士言  
官太僕乃得太僕志又歐羅巴國利瑪竇麗迪我輩行西  
洋歷法於中土徐元扈相國參驗而攷定之著崇禎歷書  
識者歎其奇博余亦求之未得雲間姜神超入都門余往  
晤之就神超索所鈔文淵閣書目神超許以見畀未數日  
而余已策蹇恩恩出春明矣卒未見文淵閣書目爲幾卷  
幾冊也居南畿最久盟友王唯士焦弱侯先生之壻也屬  
其假先生藏書數種唯士曰焦氏書誓不以假人言之無

益忽一日過廊下見有宋江鈿文海計一百冊書法工好  
裝潢精潔書賈索十金傾囊僅得三金客邸無可質貸翻  
閱竟日低徊不舍已恐書賈見厭坐所識他賈肆中託其  
持至更翻數過乃去中間頗得唐宋集十數種則口海陽  
錢塘之所購也數載以來祕本日益以稀因取壬戌以後  
所得彙爲目錄二卷以續前目四卷之後庶幾海宇安恬  
烽火漸息國無枹鼓之驚身無病魔之苦幅巾緼袍消磨  
歲月於此中則余生平志願畢矣 賴古堂尺牘新鈔宏  
緒與櫟園書乙酉入山輦載所藏書不下數萬卷鐵騎一  
來屯劄於敝居石河一勺一粒一絲一縷俱盡而所藏書  
悉被割剝擄扯裂作紙甲數千煤痕丹點離離駃騠之背

餘以支枕藉地數萬縹緗淪於一旦平生所輯有明文類  
鈔一書三十年訪求於南北詩文羅網幾盡今亦付之流  
水矣 黃宗羲天一閣藏書記江右陳士業頗好藏書自  
言所積不甚寂寞乙巳寄弔其家其子陳澎書來言兵火  
之後故書之存者惟熊勿軒一集而已 南雷詩歷哀陳  
晉州士業詩南都昔是論文地攜手同尋未見書銷盡故  
吾陰火力始留人物歲寒餘兩楹陽厭當春老一帖台安  
尙夏初身後祇餘熊氏集平生集古竟何如自注余四月  
寄書士業而士業卒於二月其子陳澍見荅已祇告几筵  
昌熾案澍藏書記作澎未詳  
萬卷書侔田氏富一拳山共米家橫雕橋退谷相輝映玉鏡

蓬壺際

聖明 孫承澤耳伯 梁清標玉立

顏氏尺牘姓氏攷孫承澤字北海號退谷山東益都人順  
天上林苑監籍明崇禎四年進士 國朝歷官吏部侍郎  
昌熾案承澤字耳伯北海猶漢人之言北海孫賓谷其族  
望也顏氏誤 曹溶萬卷堂藝文目跋明宗室藏書以灌  
甫宗正爲最孫北海少宰令祥符就其第鈔經注二百餘  
冊載歸京師 畿輔通志承澤築退谷於西山耄而好學  
有明一代典故尤瞭如指掌博古精鑒一時圖書之富比  
之宋田氏云 平津館鑒藏書籍記元板春秋纂例有北  
平孫氏研山齋圖書朱文方印 徵刻唐宋祕本書例近

代藏書惟北平孫北海少宰真定梁棠村司農爲冠少宰  
精於經學司農富於子集昌熾案棠村梁相國清標號也  
相國字玉立亦號蕉林直隸真定人明崇禎癸未進士  
國朝官至保和殿大學士精於鑒賞所藏法書名畫甲天  
下刻秋碧堂法帖竹垞有題王維伏生圖云庚戌觀於北  
平孫侍郎蟄室旣而歸於棠村梁相國知二公同鄉同官  
賞鑒亦略同也 翁方綱復初齋詩集蕉林書屋圖喬萊  
爲棠村作項家蕉窗梁蕉林圖書之富甲古今蕉窗圖畫  
我未見蕉林有此清且深作圖者誰喬白田棠村弟子館  
閣賢一時文儒盛簪紱相過鑒賞追聯翩蒼巖印記卷對  
啟秋碧堂帖工初鐫風清日朗暴秋午蓬壺玉鏡披暄妍

又云蕉林書目已不存燕南石墨哀何人諸老笑談皆典  
故畫者安得傳精神焚香展軸嗟李寅自注又一幅廣陵  
李寅爲棠村畫題云朝堂暇歸書屋展古畫脩閒福 又  
憚南田蕉林書屋圖構李紀蕉窗梁家軸又雙誰能憚格  
擬氣合李寅降 何紹基東洲草堂集真定訪梁氏蕉林  
書屋晤石川司馬老屋僅存收藏久匱尙餘蕉林書屋圖  
冊廿四幅耳慨而有作 聖人龍興大涵育先代儒

臣悉甄錄近畿文藻數誰家梁氏雕橋孫退谷買書日下  
海王村近接孫公前後園少宰風流零落盡西山子姓幾  
人存真定梁家經世變名山別墅仍幽倩又云梅村昔賦  
雕橋莊君恩世澤紛鋪張但知蟬冕百年盛豈識芸籤奕

書四  
葉香自注石川爲蕉林元孫

一紙書傳鉏菜翁山潛豕祕與人同古人慧命從今續盡向

金陀拜下風

曹溶潔躬

鶴徵前錄曹溶字潔躬又字秋岳號倦圃浙江秀水人崇禎丁丑進士仕至御史入國朝歷戶部侍郎出爲廣東布政使左遷山西陽和道著靜惕堂集 構李詩繫溶晚年自號鉏菜翁築室范蠡湖顏曰倦圃 宋彝尊倦圃圖記倦圃在范蠡湖之濱宋岳珂倦翁嘗留此著書所謂金陀坊是已地故有廢園戶部侍郎曹先生潔躬治之以爲別業聚文史其中暇則與賓客浮觴樂飲以倦圃名者蓋取倦翁之字以自寄也 池北偶談曹侍郎秋岳好收宋

元人文集嘗見其靜惕堂書目所載宋集自柳開河東集已下凡一百八十家元集自耶律楚材湛然集已下凡一百十有五家可謂富矣 靜惕堂集流通古書約自宋以來書目十有餘種其書十不存四五非盡久遠散佚也不善藏者護惜所有以獨得爲可矜以公諸世爲失策也藏書家當念古人竭一生心力辛苦成書渺渺千百歲崎嶇兵攘劫奪之餘僅而獲免可稱至幸又幸而遇賞音者知蓄之珍之謂當繡梓通行否亦廣諸好事何計不出此使單行之本寄篋笥爲命稍不致慎形蹤牙絕自非與古人深仇重怨不應若爾然其間有不當專罪吝惜者時賢解借書不解還書改一瓿爲一癡見之往記卽不乏忠信不

欺之流書既出門舟車道路遙遙莫定或僮僕狼藉或水火告災時出意料之外不借未可盡非今酌一簡便法彼此藏書家各就觀目錄標出所缺者先經次史次文集次雜說所著門類同時代先後同卷帙多寡同約定有無相易則主人自命門下之役精工繕寫校對無誤一兩月間各齋所鈔互換此法有數善好書不出戶庭也有功於古人也已所藏日以富也楚南燕北皆可行也敬告同志鑒而聽許或曰此貧者事也有力者不然但節讌游玩好諸費可以成就古人與之續命出未經刊本壽之棗梨始小本訖巨編漸次恢擴四方必有聞風接響以表章散佚爲身任者山潛豕祕羨衍人間予矯首跂足俟之矣 其藏

印曰兩河使者曰白學先生曰鉏菜翁又有樵李圓印秀州胡盧印並見式古堂書畫攷

梨莊本本盡精良觀宅何嘗非吉祥務抑輕華存微尙好噓嘉種爲寒香 周亮工元亮 子在浚雪客

昭代名人尺牘小傳周亮工字元亮號櫟園又號減齋明崇禎庚辰進士 國朝戶部右侍郎革職康熙初復僉事 歷江安督糧道好古圖史書畫有讀畫錄印人傳字觸書影闡小記賴古堂詩文集等書 又周在浚字雪客亮工長子官經歷有雲煙過眼錄晉稗梨莊集秋水軒集 賴古堂詩集自序寢庵瞿公自稱曰笠僧人率稱曰櫟下生本豫章人籍大梁然公實生梁秣陵公生於壬子四月七

日眉長垂頰人又呼之爲長眉公所著同書四卷鹽書四卷相編四卷字觸一卷詩人傳三卷賴古堂文選十卷皆次第行世 鷗陂漁話因樹屋書影述其先人作觀宅四十吉祥相其第二條架上無整齊書注云本本精良一完善手且未觸目於何有但觀架中便知腹中此爲藏書而不讀者痛下鍼砭然余謂眞能讀書者必能珍護若但如櫟園所云適足啟子弟輕褻簡編之惡習豈雅人深致哉 徵刻唐宋祕本書例大梁周子梨莊櫟園司農長公司農世以書爲業嘉隆以來雕板行世周氏實始其事游宦所至訪求不遺餘力闔謝在杭先生萬厯中鈔書祕閣後盡歸司農而遭患難數世所積化爲烏有獨此繕寫祕

本二百餘種梨莊竭力珍護歸然獨存 又朱彝尊啟黃子俞邵周子雪客藏書累葉手澤猶新玉笈縹緗不減李鄴侯之架御書炳煥何殊孫長孺之樓 又張芳論略黃周兩君祕集惟唐沈下賢宋柳仲塗金趙閒閒先列數種其餘經史逸冊有裨名教者冀公之當世略存微尙稍抑輕華 又云吾黨平時睠念前人之著述而不可必得一聞登音於空谷遂噓嘉種爲寒香

不沾學究頭巾氣不墮支那文字禪辛苦奚囊遍南北饒魚

更上海東船

黃宗羲太沖

全祖望梨洲先生神道碑公諱宗羲字太沖海內稱爲梨洲先生浙江紹興府餘姚縣黃竹浦人也忠端公尊素長

子公憤科舉之學思所以變之既盡發家藏書讀之不足則鈔之同里世學樓鈕氏澹生堂祁氏南中則千頃齋黃氏吳中則絳雲樓錢氏窮年搜討游屐所至遍歷通衢委小巷搜鬻故書薄暮一童肩負而返乘夜丹鉛次日復出率以爲常又云公晚年益好聚書所鈔自鄞之天一閣范氏歛之叢桂堂鄭氏禾中倦圃曹氏最後則吳之傳是樓徐氏然嘗語學者曰當以書明心無玩物喪志也又附記云公有日本乞師記但載馮侍郎京第乞師始末而已無豫乃避地賦則有曰歷長崎與薩斯瑪兮方粉飾夫承平招商人以書舶兮七昱緣於東京是公嘗偕馮東行而後諱之昌熾案昱緣疑略錄之論不敢輒改南雷詩

歷有移居詩云不爲安牀席先遺百本書推尋如逋寇斷爛恨饒魚又偶書第五首云書院講章村學究支那語錄莽男兒驀然跳出兩般外始有堂堂正正旗暴書雜記黃百家學箕初稟有續鈔堂書目序言黎洲保護藏書於兵火之中道雖窮而書則富昌熾案百家黎洲子也此是南雷都講地滿村黃葉語溪灣他鄉寒故終須別三載皋比返叢山吳之振孟舉

嘉興府志石門吳之振字孟舉以貢授中書有黃葉村莊詩文集黃宗羲天一閣藏書記甲辰館語溪橋李高氏以書求售二千餘大略皆鈔本也余勸吳孟舉收之余在語溪三年閱之殆遍此書固他鄉寒故也暴書雜記黃

葉村莊石門吳孟舉藏書處全謝山謂祁氏曠園之書精華歸於南雷奇零歸於石門卽指孟舉也昌熾案石門指呂莊生留良非孟舉也南雷講學石門時與莊生合得祁氏書見全謝山小山堂祁氏遺書記 池北偶談石門吳孟舉刻宋詩鈔百數十家多祕本蓋與其縣人呂莊生兩家所藏本而頴濱南豐尙不及載則未刻尙多也吳爲子言唐樊宗師宋二劉公是公非集其家皆有之 天祿琳琅明刻唐人萬首絕句吳孟舉藏書有延陵季子朱記可憐坊社但狷狷心學姚江競反脣覷破東書堂內案不禁齒冷到光輪 呂留良莊生 子葆中无黨

全祖望小山堂祁氏遺書記吾聞澹生堂書之初出也其

啟爭端多矣初南雷黃公講學於石門其時用晦父子俱北面執經已而以三千金求購澹生堂書南雷亦以束脩之入參焉交易旣畢用晦之使者中途竊南雷所取衛湜禮記集說王侗東都事略以去則用晦所授意也南雷大怒絕其通門之籍用晦亦遂反而操戈而妄自託於建安之徒力攻新建并削去叢山學案私淑爲南雷也近者石門之學固已一敗塗地然坊社學究尙有推奉之者弟子之稱狷狷於時文批尾之閒豈知其濫觴之始特因澹生堂數種而起是可爲一笑者也然用晦所藉以購書之金又不出自己而出之同里吳君孟舉及購至取其精者以其餘歸之孟舉於是孟舉亦與之絕交是用晦一舉而旣

廢師弟之經又傷朋友之好適成其爲市道之薄亦何有  
於講學也昌熾案用晦姓呂氏原名光輪改名留良字莊  
生用晦其號又號晚村子葆中字无黨義門弟子姓氏錄  
有晚村孫呂懿歷字敬授 呂莊生得山陰祁氏澹生堂  
藏書三千餘本示大火阿翁銘識墨猶新大擔論劬換直  
銀說與癡兒休笑倒難尋幾世好書人宣綾包角藏經箋  
不抵當時裝訂錢豈是父書渠不惜只緣參透達摩禪原  
注祁氏參臨濟宗 拜經樓藏書題跋記穆和齋集有呂  
氏藏書恥齋二圖記 又魯齋遺書有不遠復堂難得幾  
世好書人無黨恥齋諸圖記 又讀書敏求記谷林先生  
跋云雍正甲辰蟬花居士取禦兒呂氏明農草堂善本手

校 持靜齋書目鴻慶居士集舊鈔本有禦兒呂氏講習  
堂印 士禮居藏書題跋記小畜集吾研齋補鈔留字皆  
缺最後一畫呂无黨手鈔也又柝欄集賜書樓蔣氏藏呂  
无黨鈔本謹慎之至於漫滅處皆以細筆畫識之以存其  
眞昌熾案余見鈔本洪文惠集留字亦缺末筆有蔣子宣  
跋知吾研藏書散後皆歸蔣氏蔣吾郡藏書故家所謂賜  
書樓也

吳越野民清曠域縹帶芸籤憶趙侯從此人家添小印不當  
帖尾便書頭 馮文昌研祥 江立玉屏 韓泰華小亭

杭郡詩輯馮文昌字研祥嘉興諸生有吳越野民集注云  
研祥爲司成開之孫以次子襄仲贅於棲里沈氏遂徙家

依之 江藩金石錄跋研祥收藏甚富得右軍快雪時晴  
真蹟因築快雪堂於西湖之孤山自嘉禾移居武林遂爲  
杭人焉 讀書敏求記金石錄吾友馮研祥有不全宋槧  
本刻一圖記曰金石錄十卷人家長箋短札帖尾書頭每  
每用之亦藝林中一美談也 淮海英靈集江立字玉屏  
號雲溪舊居杭州移籍儀徵有宋板金石錄因題其齋曰  
金石錄十卷人家著小齊雲山館詩鈔 張燕昌刻印跋  
馮研祥金石錄今爲玉屏先生所有珍重示余余爲用飛  
白書刻印以贈藝林中又增一段佳話矣 昌熾案是書  
後歸趙晉齋魏復相繼爲阮文達韓小亭所得今藏座主  
潘文勤師滂喜齋韓名泰華浙江仁和人官潼關道晚年

僑居金陵築玉雨堂藏書甚富有元人集百餘家皆傳鈔  
精本或 四庫所無而元刊僅存者嘗欲輯元文選以十  
家作一集道光庚戌首集既成卽燬於兵其所著無事爲  
福齋隨筆云金石錄明以來多傳鈔惟雅雨堂刻之阮文  
達有宋槧本十卷卽敏求記所載者文達自撫浙至入閣  
恆攜以自隨一日書賈來售驚喜欲狂余得之亦刻金石  
錄十卷人家小印又攷翁蘇齋詩阮公積古邁歐趙蘇齋  
快與論墨緣恰逢葉子仿篆記宛如舊石馮家鏤又云葉  
子篆樣又摹副其一畀我蘇齋筵則翁阮二家亦有此印  
也曩年假館滂喜齋文勤師嘗出以相示有馮文昌印字  
研祥馮氏三餘堂收藏馮子元家藏印平安館印五朱記

其餘各家題詞圖記充然滿幅洵驚人祕笈也 又案天  
祿琳琅續編分類補注李太白詩元萬玉堂刊馮氏藏本  
有馮氏圖書馮印文昌文字之祥文字之祥君家其昌馮  
氏三餘堂收藏快雪堂圖書印茅齋玩賞清曠之域茅屋  
紙窗筆精墨妙諸印

童子敲門送赫蹏篝燈未罷已鳴雞巫陽忽下申生駕自古

厲階煽豔妻

葉奕林宗

子裕祖仁

讀書敏求記吾友葉林宗篤好奇書搜訪不遺餘力每見  
案頭一帙必假歸躬自繕寫篝燈命筆夜分不休我兩人  
獲得祕冊卽互相傳錄雖昏夜叩門兩家童子聞聲知之  
好事極矣林宗歿余哭之慟爲文以祭之曰昔我與君定

交杵曰奇文同賞疑義相剖又曰墊巾步履頻煩往來尺  
蹠問字一日幾回君亡來三十餘年遍訪海內收藏家罕  
有如君之真知真好者每歎讀書種子幾乎滅絕矣 七  
十二峰足徵集葉奕字林宗好學多藏書名與石君上下  
子祖德祖仁皆少有才名林宗後娶妻二子俱失愛以憂  
死士論少之 又葉修字祖德林宗長子與弟祖仁迭爲  
酬唱名其集曰華萼集 又葉裕字祖仁林宗次子右手  
駢指自稱枝指生游錢牧齋陳確庵之門以後母故失愛  
於父鬱鬱以死年止二十五虞山陸豈凡好道志怪之士  
也庚子歲四月九日去祖仁之亡將期年矣豈凡於紫雪  
壇扶乩忽飛筆書遠山微抹送橫波細骨輕軀豔綺羅云

云題鬼仙葉祖仁作林宗寶藏其筆以爲真申生伯奇千古同聲一哭 愛日精廬藏書志孫覲大全集葉石君跋此書爲從兄林宗借去幾十年矣乙巳之春林宗卒爲之整書始得檢歸 韶宋樓藏書志沈下賢集葉石君跋崇禎戊寅得沈亞之集爲林宗乾沒近來林宗物故書籍星散宋元刻本盡廢於狂童敗婦之手予生平不欺其心自信書籍必不若林宗死後之慘 昌熾案沈下賢集今在常熟瞿氏林宗自跋題崇禎四年冬十一月記於虞山之瑟室又士禮居藏書題跋記元本金石例有跋題順治乙未夏五月兩窗支指生葉裕

金庭玉柱太湖東述古精嚴未許同石癖書淫成底事驅雞

牧斃作冬烘

葉樹廉石君

徐乾學葉石君傳葉石君者隱君子也性嗜書世居洞庭山中嘗游虞山樂其山水因家焉所至必聚書常損衣食之需以購書多至數千卷會鼎革兵燹盡亡其貲財獨身走還洞庭其鄉人相與勞苦石君顰蹙曰貲財無足言獨惜我書耳鄉人皆笑之已復居虞山益購書倍多於前石君所好書與世異每遇宋元鈔本雖零缺單卷必重購之世所常行者勿貴也其所得書條別部居精辨真贋手識其所由來識者皆以爲當有三子時誠之曰若等無務進取但能守我書讀之足矣年六十七卒於家石君旣歿而鄉人益思之以爲王君公仲長子光流亞也其友黃儀子

鴻嘗爲予言因爲之傳石君名樹蓮嘗爲邑諸生已而棄去石君其字也 藏書記要余見葉石君鈔本校對精嚴錢遵王書籍裝飾雖華不及也又云石君所藏書皆手筆校正博古好學稱爲第一葉氏之書至今爲寶好古同嗜者賞識焉 七十二峰足徵集何義門侍講亦最喜石君所閱書謂攷訂精審評騭古今源流瞭然別見手眼一時好事者因義門之言爭購其書於是樸學齋所藏不脛而走 石君獨居詠懷詩茅齋卻無機驅雞與牧豕 又和秋日言懷詩魯論半編囊底在村中只指是蒙師 昌熾案石君金石文隨錄手彙六冊何夢華藏見竹汀日記臨川李氏所藏宋拓羅池廟碑卽其家本有石君題字石君

一名萬樹廉之廉亦作蓮其藏書跋多題南陽穀道人或題南陽道穀其印曰樸學齋曰歸來草堂曰金庭玉柱人家

淺草江南綠未深太原公子裊裘臨橐金半入名山藏一片孤雲萬里心

張拱端孟恭

錢受之張孟恭江南草序孟恭晉產居吳游必就士橫經藉史好學深思 愛日精廬藏書志汗簡七卷陳氏鴻跋曰崇禎辛巳余讀書於吳門維斗師之古柏軒秋日同張孟恭至城隍祠右古書籍鋪中見此汗簡狂喜欲舞急解金購歸後馮已蒼假來鈔得余於庚寅從已蒼借鈔 又會昌一品集有題字曰崇禎庚辰冬十月名山藏收藏又

書四  
葉石君手識曰戊子年夏假得太原張孟恭所藏昌熾案蘇州府志藝文類國初有張拱端孤雲集詩一萬首山西人寓吳中必其人也又案漁洋感舊集有趙瑾懿侯歲暮至臨安留別張孟恭葉祖仁詩瑾爲山西太原人而集中又有虎邱月夜蘇州清明二詩則是與孟恭同里而同爲寄公於吳祖仁爲林宗之子與馮已蒼葉石君皆富收藏孟恭並與之友則其風尙可知矣

潦草醫方廢歷堆不教空手寶山同一尊敬爲西崑壽崩角完時倒舊醅

朱之赤臥庵

楹書隅錄影宋精鈔西崑酬唱集二卷毛斧季跋云甲辰之月同葉君林宗入郡訪朱臥庵之赤其榻上亂書一堆

大都廢歷及潦草醫方殘帙中有繕整一冊抽視之乃西崑酬唱集爲之一驚卷末行書一行云萬歷乙丑九月十七日書畢下有功甫印乃錢功甫手鈔也因與借歸次日林宗入城喧傳得此最先匍匐而來者定遠先生也倉忙索觀陳書於案叩頭無數而後開卷朗吟竟日索酒痛飲而罷昌熾案天祿琳琅道命錄及明板水經山海經合刻皆有朱臥庵收藏記而宋樓藏書志愧郊錄亦有朱臥庵朱之赤印記周季貺云臥庵著名於治熙時彭躬庵爲撰母夫人墓誌稱其學問淵雅通天文術數亦一奇士也天祿琳琅續編自警編有朱印之赤臥庵朱臥庵收藏印狂奴正氣堂三天謫吏煙雲逸叟各朱記

楓山金澤兩官庫金剛佛子文識房半是中華流落出海天  
如鏡估帆張 蔣琦絢臣 蔣玠綱臣

經籍訪古志通志二百卷明萬曆十七年刊本楓山官庫  
藏有蔣琦之印絢臣父二印序目有閩中蔣氏三徑藏書  
蔣絢臣曾經祕藏二印 又文選袁褰刻本卷首有是書  
曾藏蔣絢臣家印注六源宏賢所藏唐人小說亦有蔣絢  
臣藏書印 甬宋樓藏書志鶴田蔣先生文集有蔣氏手  
跋曰此集爲楊文敏公家藏徐興公先輩得之於建甯書  
肆絢臣玠識昌熾案滂喜齋藏存復齋集有順治丙申蔣  
玠手跋又有蔣玠及綱臣珍藏圖書二印琦字絢臣玠字  
綱臣陸氏又合爲一俟攷

參閱名登野史亭謗書酷甚腐遷刑空王難贖多生劫碧血  
湖隄走鬼燐 張雋文通

陸心源明鈔春秋纂言跋每冊有張雋之印案雋字非仲  
吳江人一名僧願又字文通樓居積書甚富手錄者千餘  
卷擁列左右南潯莊廷鑑聘修明史爲作有明理學諸儒  
傳其稟別行名與斯集史案未彥自知其非逃於僧舍年  
已七十後與潘檉章吳炎諸人同伏法於杭州著有西廬  
詩草四卷見南潯鎮志 楊鳳苞記莊廷鑑史案本末廷  
鑑以朱文肅公史概稟本續纂天啟崇禎兩朝名曰明書  
輯略吳江張雋名在參閱中凌遲死 平津館鑒藏書籍  
記唐鑑二十四卷有張雋一字文通印 鐵琴銅劍樓書

目朱慶餘詩集一卷卷首有張雋之印字文通諸朱記  
花雨生公舊講臺一牛鳴地草堂開雲陽文字歸殘劫斷瓦  
牆陰長綠苔 顧苓云美

錢受之顧象垣墓誌銘長洲顧君諱維鼎字象垣以己亥  
歲四月十七日卒長子苓 元和縣志顧苓字云美潛心  
篆隸凡金石碑版及鼎彝款識蟲魚科斗之書皆能誦之  
居虎邱山塘蕭然敝廬中懸思宗御書時肅衣冠再拜歛  
歔太息 蘇州府志塔影園在虎邱便山橋南數武文肇  
社所築後顧苓云美居之更名雲陽草堂又有室曰松風  
寢 錢受之雲陽草堂記顧子云美卜居於雲巖之陽讀  
書尙志撫今懷古讀後漢書宣秉傳論其世而知其人穆

然太息顏其三閒之屋曰雲陽草堂 又云云美之居去  
雲巖一牛鳴地入寺門平石穹然晉生公說法處也 士  
禮居藏書題跋記林和靖詩集余向於郡故藏書家得一  
鈔本云是顧云美手鈔珍藏之 鐵琴銅劍樓書目隸續  
顧云美氏手鈔有塔影園客朱記 又石刻鋪敘義門得  
諸塔影園顧氏

君如坡老愛陶潛何似老蘇愛織簾爲訪河東三篋去渡江  
昨夜宿蒼蒹 顧湄伊人

國朝詩人徵略顧湄字伊人江南太倉人有水鄉集 江  
蘇詩徵湄本惠安令程新子新與顧夢麟善夢麟無嗣幼  
鞠湄遂姓顧氏注伊人爲織簾先生之子又傑出於確庵

之門昌熾案織簾顧先生麟士也確庵陳先生瑚也錢  
受之陶廬記顧子伊人得宋刻蘇長公所書陶淵明集藏  
弄齋中晨夕吟諷名其處曰陶廬讀書敏求記陶淵明  
集十卷婁江顧伊人藏弄宋槧本顏其讀書處曰陶廬而  
請牧翁爲之記伊人交余最厚真所謂兄弟也但各姓耳  
見余苦愛陶集遂舉以相贈丙午丁未之交余售書季滄  
葦是集亦隨之而去滄葦沒書籍散入雲煙過眼錄矣伊  
人前年渡江念陶集流落不偶訪求得之持歸示余河東  
三篋亡來已久一旦頓還舊觀展卷相向喜可知也予畀  
之牧翁陶廬記手稟俾揭之簡端以見我兩人鄭重其書  
互以藏之外府爲快視世之借書爲一癡者其度量相越

豈不遠哉士禮居藏書題跋記宋刻唐求詩有陶廬顧  
湄之印

寫韻樓高敞綺窗旋風葉葉捲成雙滄洲一臥何時起善本  
連艫盡過江季振宜說兮

天祿琳琅毛詩二十卷季振宜藏書有宋本橢圓印振宜  
字說兮號滄葦揚州泰與人順治丁亥進士授蘭溪令歷  
刑戶兩曹擢御史讀書敏求記吳彩鸞書切韻余從延  
令季氏曾觀其真蹟逐葉翻看展轉至末仍合爲一卷張  
邦基墨莊漫錄云旋風葉者卽此真曠代之奇寶因悟古  
人玉躡金題之義唐六典所以有熟紙裝潢匠之別也自  
北宋刊本行世而裝潢之技絕矣余幸遇此韻得觀唐時

卷帙舊觀季氏零替不知歸之何人惜哉 黃丕烈季滄  
葦書目序滄葦書目載宋元板刻以至鈔本幾於無所漏  
略余閱述古堂藏書目序有云舉家藏宋刻之重複者折  
閱售之泰興季氏是季氏書半出錢氏而古書面目較諸  
錢氏所記更詳今滄葦之書已散失每從他處得之證諸  
此目若合符節方信藏書不可無目且不可不載何代之  
刻何時之鈔俾後人有所徵信也 昌熾案天祿琳琅又  
載宋板文選明板長慶集皆有滄葦吾道在滄洲朱記又  
追昔游詩季滄葦藏有柱下史方印又明刻元豐類彙有  
得知千載外正賴古人書十字長印與季振宜藏書印均  
在序首疑亦季氏所鈐也

洞庭波兮渺愁予故人來自碧山居香山海嶽雲林筆價重  
人閒未見書 孫潛葢園

吹網錄避暑錄話世傳惟稗海津逮兩本曩聞郡中某氏  
藏有二本一爲孫潛夫依舊鈔善本手校於稗海本上一  
爲鈔本而未校者余曾借得未校之本有黃蕘翁跋謂自  
序一篇商毛二刻所無孫氏據舊鈔本補入似卽黃氏錄  
孫潛夫本也 士禮居藏書題跋記唐僧宏秀集孫潛夫  
藏本 鐵琴銅劍樓書目五代史闕文孫潛夫鈔卷末記  
云辛酉夏六月借黃俞邵鈔本一劬 又江文通集有孫  
潛之印孫二酉珍藏諸朱記 昌熾案全謝山校水經注  
一爲孫潛夫本謝山跋云予游吳下問諸後進莫知潛夫

之本末者矣潛夫名潛字菽園一字節生又曰知節君又  
附錄潛夫跋云康熙丁未十一月十八日從葉石君處借  
清常道人三校本一勘又用柳大中家鈔宋本再勘是日  
石君從洞庭來述山中所聞見如李龍眠之馬米元章楷  
書寶章待訪錄其所見也白樂天手寫金剛經一行一楷  
趙韓王家譜張循王鐵券倪雲林手書所著江南詞其間  
而未見者也

七十二峰縹緲閒具區煙水碧潺潺明懷餘韻宛然在江月  
松風見一斑 翁澍季霖 子校秀升 栻猶張

八七十二峰足徵集翁澍字季霖博古嗜學不求仕進自號  
胥母山人搜羅湖山名勝人文事蹟爲具區志 又翁校

字秀升季霖長子縣諸生 又翁栻字猶張少從金耿庵  
先生游酷嗜藏書玉峰徐司寇蘇城顧惟岳陸其清兩家  
宋元鈔本皆乞借鈔字畫端楷題識歲月於後作詩八卷  
曰鈞采吟 昌熾案抱經堂書賈陳某曾以舊鈔江月松  
風集求售後有跋云錢思復手稟好事家裝裱成冊錢罄  
室曹秋岳先後收藏秋岳亡後伯兄駕徵於金閶見之傾  
囊得歸此本乃余手鈔校對獨細惜有闕落無從攷補至  
字畫間有舛誤亦從闕疑大抵古人手筆當仍其舊不可  
妄以己意增損也康熙丙寅季秋之十三日東洞庭山又  
張翁栻識下有栻翁又張南陔三印又題云旁有朱字乃  
錄金亦陶夫子所改又補題竹西居士圖詩一首後注云

從金迂齋夫子處鈔來據此則猶張實爲金侃弟子足徵  
集以爲從金耿庵游誤也又按太湖備攷云翁澍與下堡  
金侃交最善延至家塾商榷古今枻爲澍子亦陶爲耿庵  
先生子侃尙及與澍交則枻不及事耿庵明矣校爲澍長  
子則枻跋中所稱伯兄駕徵當是其號枻有同伯兄駕徵  
自橫塘返山詩二首見足徵集

骨董僧寮列肆厖碎銅玉石鬪雞缸不堪重到慈仁寺寂寞

雙松護碧幢

王文簡士禎

昭代名人尺牘小傳王士禎字貽上號阮亭自號漁洋山  
人新城人順治乙未進士官至刑部尙書乾隆間補諡文  
簡 朱彝尊池北書庫記池北書庫者今少詹事新城王

先生聚書之室也新城王氏門望甲齊東先世遺書不少  
然兵火散佚者半先生自始仕迄今日耕肘書借觀輒錄  
其副每以月之朔望翫慈仁寺日中集奉錢所入悉以購  
書蓋三十年而書庫尙未充也 古夫子亭雜錄昔在京  
師士人有數謁予而不獲一見者以告崑山徐尙書健庵  
徐曰此易耳但值每月三五於慈仁寺市書攤候之必相  
見矣如其言果然廟市賃僧廊地鬻故書小肆皆曰攤也  
又書賈欲昂其直必曰此書經新城王先生鑒賞者鬻銅  
玉器則曰此經商邱宋先生鑒賞者士大夫言之輒爲絕  
倒 藤陰雜記孔東塘尙任燕臺雜興云彈鋏歸來抱膝  
吟侯門今似海門深御車埽徑皆多事只向慈仁寺裏尋

注云漁洋龍門高峻人不易見每於慈仁廟市購書乃得一瞻顏色 居易錄余官都下二十餘載奉錢之入盡以購書嘗冬日過慈仁寺見尙書大傳朱子三禮經傳通解荀悅袁宏漢紀欲購之異日侵晨往索已爲他人所有歸來招悵不可釋病臥旬日始起古稱書淫書癖未知視予何如自知玩物喪志故是一病不能改也亦欲使吾子孫知之

鹽官城畔螺浮宅月落烏啼喚奈何欲續清河書畫舫圖書

松下已無多

張惟赤 子皓小白 孫芳湄葭士 曾孫宗松 宗備 載華 柯 元孫鶴徵 張培元

江亭

吳騫涉園修禊記涉園在海鹽縣城南三里故給諫螺浮

張先生所創志稱烏夜邨故址也亭池林木之勝甲於東南而主人醞舫雅好事歲甲寅暮春之初醞舫招同人修豕和故事余爲之記 甯宋樓藏書志聖宋本甲寅秋偕陳日鮑以文言海鹽張皜亭主政藏有影宋本甲寅秋偕陳君仲魚訪張子醞舫於涉園主人賢而好客示以祕藏諸籍獲觀是書眞生平大快也 兩浙輶軒錄張柯字晉樵一字東谷海鹽人官杭州府訓導著撻雲樓詩橐汪家穀曰張氏爲浙西望族其先螺浮先生以給諫起家城南烏夜邨有涉園其別業也學博與朱笠亭陸太沖輩日坐嘯其中圖書彝鼎望而知爲故家物 又張宗松字青在一字楚良又字蠖廬海鹽人著寒坪詩鈔楊秉初曰君性耽

吟詠家富藏書鑒別最精 楹書隅錄宋本源流至論有  
涉園主人鑒藏古鹽張氏小白珍藏古鹽涉園張氏守白  
齋珍藏書畫之章各印 鐵琴銅劍樓書目李文饒集古  
鹽張氏藏書有張載華印芷齋圖籍二朱記 持靜齋書  
目山谷刀筆有張載華芷齋圖籍古鹽張氏松下圖書朱  
記又樂靜集有海鹽張氏研古樓藏書及芷齋圖籍二朱  
記 又拾園張氏書目四冊不著書籍原委但列第幾架  
第幾層某函某書而已 昌熾案舊在京師順德龍伯鸞  
鳳鏤以所藏呂无黨手鈔後村集見示有古鹽張氏及宗  
櫛詠川諸朱記詠宋藏書陸宣公集有張載華佩兼諸印  
張氏藏印諸家著錄數見不鮮顧其世系未能詳也宣統

紀元之歲暮重雕此集至第四卷張鞠生農部元濟自滬  
上寓書來云螺浮給諫是其先德以涉園世系見示始知  
螺浮先生名惟赤順治乙未進士刑科給事中長子皓號  
小白別號晴亭康熙壬子舉人有三子長芳溶早逝以弟  
子宗松爲嗣次芳湄號象賢一字葭士宗松卽其次子號  
青在又號寒坪著有捫腹齋詩鈔卽農部之六世祖也第  
五子曰宗柟號吟廬別號含丁著有帶經堂詩話第六子  
曰宗櫛號詠川一號思巖第八子曰載華號佩兼一號芷  
齋柯字晉樵一字東谷葭士弟芳潢之子也鷗舫名鶴徵  
佩兼之長子以諸家書目藏印證之世德清芬若合符節  
螺浮先生爲王文簡同年進士宜次其後是卷繕刻至葉

石君一首而農部函適至猶及改纂不先不後若有天幸豈非先哲有靈有以牖啟之乎附誌於此以箴前闕亦農部君志也歲在庚戌元日緣袞記 又案嘉興府志平湖張培元字江亭監生好書購宋元本千卷持靜齋書目金陀粹編卷首有張培源江亭氏諸印卽其人也但元作源爲異

天賜蒲陶出

禁廚不將薏苡當明珠蘇詩精似吳興刻斷鶴何須浪續鳧  
宋犖收仲 子筠蘭揮

先正事略宋犖字牧仲號漫堂河南商邱人大學士文康公權子也以大臣子列宿衛官至江蘇巡撫戶部尙書子

至字山言癸未進士授編修浙江提學道著有緯蕭堂詩集筠官檢討 沈文懋奉天尹宋公墓誌銘公諱筠字蘭揮號晉齋旣冠捷南宮由江西藩司晉奉天府尹 朱彝尊西陂記宋公懷童時釣游之所思築圃曰西陂命禹鴻臚之鼎作西陂魚麥圖取元結詩句冀歸老於江湖也

天子書魚麥堂以賜公嘗引年 天子給以禁

苑蒲陶一本曰是果結實然後請老 又巡撫宋公以新雕蘇詩施注見貽賦謝詩中丞訪得嘉泰本上客爲補由儀詞梅谿舊箋付醬瓿傳稗遺楷傳漕司昌熾案商邱所得宋本僅有十二卷當付雕時邵長蘅爲補其缺謬誤甚多翁蘇齋詩所謂奇哉漫堂寶殘泐惜也邵補功微愆是

也 綿津詩集齋中三詠松雪齋集一首云雅願終身作  
蠹魚吳興集刻至元初華亭小記增珍重不數虞山舊漢  
書 儀顧堂元槧白虎通跋每冊有毛子晉宋蘭揮印汲  
古閣祕本書目爲潘稼堂開值議價不諧其書多爲商邱  
宋氏所得 持靜齋書目青綸館藏書目錄一卷 國朝  
宋筠撰 又耿文明詩集有商邱宋筠蘭揮氏己丑進士  
太史圖書魚麥堂諸印 禹之鼎洗竹圖宋犖題詩有白  
馬客裔印 天祿琳琅胡子知言宋犖藏本有緯蕭草堂  
印 平津館鑿藏書籍記寫本雪溪詩有蘇松庵白文方  
印雪苑宋氏蘭揮藏書記朱文長印 士禮居藏書題跋  
記卻埽編有宋筠蘭揮三晉提刑諸印 鐵琴銅劍樓書

目叢桂毛詩集解宋蘭揮所藏每冊有筠字圓印鐵圍山  
叢談卷首有宋氏蘭揮藏書善本朱記

上堂學參臨濟禪登山喜拍洪厓肩仙耶佛耶抑儒耳抱書  
獨上南山顛 錢陸燦爾跋

海虞詩苑圓沙先生錢陸燦字爾弢號湘靈中順治丁酉  
鄉試第二晚節居南山北麓老屋三閒叢書兩板臨街誦  
讀聲出金石年近九十兩眸青碧似仙生平篤信宗門臨  
終洒然又似老爛頭陀云 東湖叢記湘靈先生晚歲逃  
禪其手校之書每押以明經別駕書經解元臨濟三十四  
彭祖九十七世一印又曰陸終彭祖後人余藏有先生手  
批元遺山集有跋題圓沙老書生記書法縱橫蓋老年筆

也 鐵琴銅劍樓書目南華真經邑人錢圓沙手閱本末  
有乙卯年七月二十日東圃書堂閱完一行卷首有調運  
齋湘靈好夢諸朱記 持靜齋書目韓子明孫鑛節鈔本  
錢湘靈手批朱藍炫然卷首有儒師馬文肅佛嗣熊燦庵  
圓沙彭祖同庚壬子癸丑草創大還堂陸燦湘靈諸印

一洗空華變闖茸瑤臺牛篋出塵封一門並擅名山藏白鹿

爭高指玉峰

徐乾學健庵  
炯章仲

弟秉義果亭

元文立齋

子

同治蘇州府志徐乾學字原一號健庵應聘曾孫康熙庚  
戌進士第三人及第官刑部尚書傳是樓藏書甲天下

徐秉義字彥和號果亭康熙十二年以進士第三人登第  
內閣學士兼禮部侍郎秉義通籍後以兄弟並在華省深

懷謙退杜門卻掃購求古書或借稟本鈔錄 徐元文字

公肅號立齋順治己亥一甲第一名及第文華殿大學士  
兩江總督傅臘塔劾元文兄弟家人不法事元文奏辨遂  
力求罷以原官致仕舟過臨清榷關者欲構其罪登舟大  
索惟圖史數千卷光祿饌金三百兩而已 儋園集寄曹

秋岳先生詩嗟予纔縮髮屈首事誦習博瞻服茂先舛陋  
媿難及發憤購遺書蒐羅探祕笈從人借鈔寫瓶甌日不  
給 黃宗義傳是樓藏書記喪亂之後藏書之家多不能

守異日之塵封未觸數百年之沈於瑤臺牛篋者一時俱  
出於是南北大家之藏書盡歸先生先生之門生故吏遍  
於天下隨其所至莫不網羅墜簡搜抉緹帙而先生爲之

海若 又曰自傳注之學變爲時文空華臭腐人才闕茸  
至於細民亦皆轉相模倣以取衣食遂使此物汗牛充棟  
而先王之大經大法蕩爲荒煙野草由大人之不悅學以  
致之也數窮必復先生主持文運當必有以處此人將指  
此樓也與白鹿爭高矣 汪琬傳是樓記徐健庵尙書築  
樓於所居之後凡七楹斲木爲廚貯書若干萬卷部居類  
彙各以其次素標緗帙啟鑰爛然與其子登斯樓而詔之  
曰吾何以傳女曹哉因指書而欣然笑曰所傳者惟是矣  
遂名其樓爲傳是 昌熾案傳是樓宋元本書目吳次瀟  
同年丙湘刻之廣陵秉義有培林堂書目元文有含經堂  
書目 紅豆樹館書畫記載司寇行書五言長律墨蹟引

首用冠山堂印 天祿琳琅續編禮記余仁仲刊藏徐乾  
學家有徐炯收藏祕笈徐炯收藏書畫徐章仲所讀書徐  
仲子別號自彊諸朱記炯字章仲乾學之子官直隸巡道  
犁牛駢角難爲爾委鬼茄花已忽諸想見東林諸老集三薰

三沐四香居

陳自舜小同

鄭梁陳堯山墓誌銘君諱自舜字同亮別號堯山父朝輔  
明萬曆丙辰進士太僕寺少卿君始爲秋水社繼爲澹園  
社其閒捧盤執耳皆極一時之選而當世之耳而目之者  
多指雲在樓之公子爲不可少蓋至是而人知太僕之有  
子矣雲在樓者太僕所建以爲游息之所也所蓄圖書玩  
好頗富手口之澤亦多君一一珍藏每遇名流鑒賞輒求

題識君卒於康熙辛卯六月廿一日距生前明甲戌七月  
十一日春秋七十有八子憲淇 全祖望七賢傳萬厯天  
啟之交黨禍方熾吾鄉以沈文恭在揆席故多爲所染陵  
夷至於奄難士氣益喪至有列名爰書者顧喜其家子弟  
多能出而雪父兄之恥陳御史朝輔有子自舜字小同甚  
媿其父之所爲不欲人稱爲公子黎洲先生講學甬上小  
同從之終日輯香經學兀兀不休黎洲座上或言天啟時  
某官以某物贈奄卽御史所爲也小同爲之數日不食喜  
購書其儲藏爲范氏天一閣之亞

年少金閨游俠兒不工挾彈善填詞高齋賓客今何在腸斷  
摩挲玉印時 納蘭性德容若 揆敘愷功 穴研齋

昭代名人尺牘小傳成德氏納喇又作納臘亦稱納蘭字  
容若後改名性德遼陽人太傅明珠子康熙癸丑進士選  
侍衛愛才好客所與游皆一時名士嘗集宋元以來諸儒  
說經之書刻爲通志堂經解一千八百餘卷精鑒藏尤工  
於詞所刻飲水側帽詞傳寫徧於邨郊郵壁 國朝詩人  
徵略揆敘字愷功滿洲人官至左都御史諡文端有益戒  
堂集 伍崇曜飲水詞跋韓慕廬稱容若嘗輯全唐詩選  
晚乃篤意於經史茶餘客話稱其天姿英絕蕭然若寒素  
擁書數萬卷彈琴歌曲評書畫以自娛 藤陰雜記明太  
傅自怡園延唐東江查他山課子揆敘唐有園居雜詠詩  
如流水游龍非馬尉赤墀青瑣異王根想見繁華氣象東

江又有哭揆愷功詩云猶有高齋舊賓客可憐水磨好園  
林 知聖道齋讀書跋謙牧堂藏鈔本金張師顏南遷錄  
一卷又云於謙牧堂藏書中得宋元人詞二十二帙題曰  
汲古閣未刻詞行款字數與已刻六十家詞同每帙鈐毛  
子晉印皆精好 昌熾案謙牧堂愷功藏書處也容若曰  
珊瑚閣昔聞之潘文勤師云愷功藏書皆歸 天府  
天祿琳琅著錄有謙牧堂印記者皆其家書也武進費昶  
懷同年藏容若玉印一面鐫繡佛齋一面鐫鴛鴦館 士  
禮居藏書題跋記陸游南唐書丁卯歲收得穴研齋鈔本  
卷末一頁格旁有虞山錢遵王藏書七字 又何博士備  
論通二十六篇不分卷因其爲穴研齋繕寫珍之先是收

得穴研齋諸書初不知時代先後惟陸游南唐書爲虞山  
錢遵王藏書則在遵王先矣他爲宋人說部總得於松江  
故宦家有賈人知其由來謂出於康熙朝明相國家 又  
茅亭客話穴研齋本爲佳 昌熾案茅亭客話後歸亡友  
蔣香生書鈔閣香生述周季貺之言曰穴研裝潢精美似  
國初旗人之風雅好事者或出自明相國家與蕘翁所  
記賈人之言合

誰爲楚濱誰豸年草堂新築直沽前豈因小綠天亭印遂誤  
觀光自哲鮮 安岐儀周

非石日記書賈錢聽默云傳是樓藏書大半歸於明珠而  
其家人安麓村所藏亦多善本 又黃蕘圃家觀北宋本

孟東野集上有徐健庵季滄葦及安岐印每本卷末有安麓村楷方圖記 楹書隅錄北宋孟東野詩集十卷每冊有安岐之印儀周珍藏安麓村藏書印各記安岐字儀周麓村其號也亦號松泉老人天津人顏所居曰沾水草堂學問宏通極精鑒賞收藏之富甲於海內著有墨緣彙觀亦一時博雅好古士也百宋一廬賦著錄此本謂麓村乃賣骨董者誤矣周芸皋觀察內自訟齋文集謂儀周朝鮮人從貢使入都偶購得鈔本書乃前人窖金地下錄其數與藏處皆隱語徧視京師惟明國公府似之因見明公一指視其處先後假金數百萬業鹽於天津揚州息倍之多富收藏盡以歸國云云語尤荒誕無足辨也昌熾案紅

豆樹館書畫記陳白陽古詩十九首卷有朝鮮安氏圖書朝鮮安氏書畫圖章安氏子靜鑒定安氏小綠天亭珍藏諸印是朝鮮實有安氏精鑒藏者芸皋之言得無以此傳譌乎

綠樹芳穠小草齊棟花亭下一尊攜金風亭長來游日宋槧傳鈔滿竹西 曹寅子清

昭代名人尺牘小傳曹寅字子清號棟亭奉天人官通政使江甯織造校刊古書甚精有揚州局刊五韻棟亭十二種盛行於世 宋犖寄題曹子清戶部棟亭三首序云子清之尊人於白門使院手植棟樹數株綠陰可愛因結亭其間顏曰棟亭子清追念手澤屬諸名人賦之未幾子清

復移節白門十年中父子相繼持節一時士大夫傳爲盛事  
王槩題張見陽棟亭夜話圖詩棟亭余每坐清晝牆  
隅小草穠陰覆棟乃水部手自栽亭亦早歲攤書構又云  
唐渲宋槩任標舉陸海潘江半臣僕又吳之騷詩我聞  
棟亭下嘉樹影婆娑書卷擁百城尙友自吟哦李文藻  
琉璃廠書肆記棟亭掌織造鹽政十餘年竭力以事鉛槧  
又交於朱竹垞纂書亭之書棟亭皆鈔有副本以予所見  
如石刻鋪敘宋朝通鑑長編紀事本末太平寰宇記春秋  
經傳闕疑三朝北盟會編後漢書年表崇禎長編諸書皆  
鈔本魏鶴山毛詩要義樓攻媿文集諸書皆宋槩本錢  
大昕藝圃搜奇跋天台徐一夔編此書世無刊本曹子清

巡鹽揚州時嘗鈔以進御好事者始得購其副錄  
之

七品官兒竟奪儂爲攜小史當書傭丹房枕膝書親授始信  
人閒有蔡邕朱彝尊錫鬯孫稻孫稼翁李延昱辰山

鶴徵前錄朱彝尊字錫鬯號竹垞晚號小長蘆釣魚師又  
號金風亭長浙江秀水人明太傅國祚曾孫著有經義攷  
日下舊聞纂書亭集注云先生又有瀛洲道古錄五代史  
注禾錄諸書俱屬槩未成纂書亭集鵲華山人詩序予  
中年好鈔書通籍以後見史館所儲京師學士大夫所藏  
弄必借錄之有小史能識四體書日課其傳寫坐是爲院  
長所彈去官而私心不悔也又書櫃銘予入史館以楷

書手王綸自隨錄四方經進書綸善小詞宜興陳其年見  
而擊節尋供事翰苑忌者潛請學士牛鈕形之白簡遂罷  
予官歸田之後家無恆產聚書三十櫝老矣不能徧讀也  
銘曰奪儂七品官寫我萬卷書或默或語孰智孰愚 松  
江府志李延昱字辰山上海人初名彥貞字我生大理評  
事中立子也師事同郡徐孚遠爲高第弟子後隱於醫居  
平湖祐聖觀中爲道士其卒也以書二千五百卷贈秀水  
人朱彝尊 褚華滬城備攷李延昱字辰山號寒村原名彥  
貞進士尙袞孫大理評事中立子唐王某官事敗後遁跡  
平湖佑聖宮爲道士以醫自給聚書至三十櫃康熙辛丑  
卒 查慎行敬業堂集聞李辰山藏書多歸竹垞歎息詩

人失李頎柘湖回首舊游非自憐老友今無幾且喜藏書  
得所歸萬卷又增三篋富千金直化兩蚨飛平生謬託知  
交在悔不從渠借一瓿 胡濬三君詠李高士延昱一首  
不見李高士琳宮鎖暮霞芸香銷蠹簡鑪火冷丹砂 鶴  
徵後錄朱稻孫字稼翁一字芋陂晚號娛村著有六峰閣  
集昌熾案竹垞子昆田早卒遺二孫一桐孫一稻孫阮文  
達修暴書亭詩所謂笛漁早死雙孫老誰暴遺書向此亭  
也蒲褐山房詩話稼翁晚年貧不能支暴書亭藏書八萬  
卷漸致散佚藏書印曰潛采堂曰南書房舊講官張叔未  
桂馨堂集詠梅會里朱氏潛采堂藏書象牙印朱文二行  
行五字曰梅會里朱氏潛采堂藏書詩云管領奇書八萬

卷人閒此印亦千秋籤開玉版先經眼榜賜金題在上頭  
七品眞推良太史百城肯拜小諸侯南垞亭子教重建同  
是熙朝第一流自注竹垞又有一印曰七品官耳又案  
儀顧堂紫巖易傳跋每冊有秀水朱彝尊錫鬯氏朱文方  
印我生之年歲在屠維大荒落月在橘壯十四日癸酉時  
朱文方印案屠維爲已大荒落爲已竹垞生於崇禎二年  
已巳則此亦竹垞印也又暴書亭集還鄉口號云醜舫西  
偏盡竹梧紫微山石儘教鋪自注醜舫余齋名又有醜舫  
箴見集中按詒宋樓藏書志東萊毛詩句解竹垞跋署新  
煥齋

一見奇書喜欲顛祊田不惜筮牛眠漸鴻姓字無人識但見

南樓草接天

馬思贊仲安

杭郡詩輯馬思贊字寒中號南樓海甯人有皆山堂詩注  
云南樓爲揚州推官麟翔子工詩績學諸子百家無不研  
貫家有道古樓插架多宋元精槧旁及金石祕玩絹素眞  
蹟充物其中不減倪氏清閤也又馬翼贊字叔靜號  
寒將海甯人雍正癸卯進士官山東觀城知縣有寶穎堂  
詩鈔愛日精廬藏書志陸狀元通鑑某氏跋曰前年謁  
外舅陳宋齋先生談及海內藏書家先生言其故人馬寒  
中購書不遺餘力嘗過龍山查氏見案頭有宋槧陸狀元  
通鑑百計購之不可得後查氏謀葬其親所卜吉壤則馬  
氏田也寒中規知之大喜曰書可得矣卽詣查氏願效祊

田之易凡十畝書券盡付焉抱書疾歸若惟恐其中悔也其篤好如此 吳壽暘集舊藏英石峰高二尺許馬寒中先生物也賦此紀之詩云南樓道古箋魚蟲仇池兼伴吟香工又云占鴻漸兮甯高飛樂磐石兮其來歸自注寒中先生筮易得漸之二爻因以衍齋爲號並有坐磐石小影拜經樓藏書題跋記竹垞初白二先生尺牘凡六十通與寒中者十九寒中爲吾邑藏書家插架多人間未見本故書中皆論典籍事或輾轉傳鈔或多方購買於此想見前輩好學之勤嗜書之篤誠可慕也 又衍齋詩卷先子跋云予家去插花山僅一舍每登樓東望惟見寒煙衰草亂雲滿目慨望昔日之風流非特琴書圖籍散亡略盡卽

道古樓之故址且不可蹤跡頗深生不同時之恨 又宋本文中子有海昌馬思贊印中安一號漁邨圖記 又樂城集插花山馬氏藏本首葉有玉音孝友著於家庭信誼隆於鄉黨朱文印卷內有古鹽官州馬思贊之印華山馬仲安藏善本印 又剡源集寒中跋題康熙庚辰識於紅藥山房 持靜齋書目通典詳節元至元刊本有古鹽官州馬氏南樓書籍印又雪磯叢稟康熙丁亥馬素邨鈔本有古鹽官州馬素邨書畫印 昌熾案余所見殘本唐子西文集有衍齋胡盧印又衍齋師友傳遺之物亦以爲好二朱記又有前身是羅浮頭陀一印是否出寒中不可攷又案竹垞跋新莽錢範文有云歲在丁亥觀於衍齋上舍

小胡廬山書屋集中屢稱吾宗衍齋又稱宗人寒中是寒  
中本姓朱桑海之間改易名氏而世無有知者矣

綬若安裘晏若杆攬環結佩君子居司城豈必爲貧仕本讀  
司空城旦書 汪森晉賢 弟文柏季青

兩浙輶軒錄汪文柏字季青一字柯庭桐鄉人官北城兵  
馬司正指揮有柯庭餘習古香樓吟橐 汪文桂字周士  
一字鷗亭歲貢生官內閣中書有鷗亭漫橐六州噴飯集

汪森字晉賢一字碧巢官戶部郎中有小方壺吟橐

沈大成大理府知府汪君墓誌銘君祖文桂中書舍人叔  
祖森戶部郎中自號碧巢者也藏書甲於浙西中書子四  
其次繼燦歷官給事爲後於碧巢君考也君諱上墳字綺

巖子孟銷仲鈞季鏗其筮所生則彝銘也孫二人如藻如  
洋 嘉興府志秀水汪孟銷字康古弟仲鈞字豐玉家故  
饒至孟銷時漸落而先世裘杆樓萬卷之藏書故在孟銷  
兄弟搜討其閒乾隆庚午孟銷兄弟舉於鄉丙戌孟銷成  
進士有厚石齋詩集仲鈞有桐石齋詩集孟銷子如藻字  
念孫舉人值 四庫館開獻家藏書一百三十七種乙未  
成進士入翰林終山東糧道如洋字潤民爲仲鈞後乾隆  
庚子會試 廷試皆第一授修撰年四十卒昌熾案孟銷  
爲晉賢曾孫 錢儀吉吉石汪先生墓表先生兄厚石桐  
石彡石先後不祿先生盡傷心年餘謝世子如藩如瀾先  
生諱彝銘字寶吉吉石其別字 朱彝尊小方壺存橐序

休甯汪晉賢氏徙居梧桐鄉營碧巢當吟窩築華及之堂以燕兄弟賓客建裘杼樓以藏典籍其曰小方壺者郡城東角里之書屋也晉賢仕爲桂林通判調太平遷知鄭州事未赴 又汪司城詩序曩因周布衣青士友汪君晉賢既又識君哲昆周士令弟季青季青方年少結交皆老蒼海內稱詩者相與訂攬環結佩之好 潘耒摘藻堂集序吳興多佳山水休陽汪子季青築別業讀書其中名其堂曰摘藻之堂 龍城札記韓詩外傳云君子之居也綏若安裘晏若覆杼桐鄉汪氏嘗取裘杼二字以名其樓然其實杼乃杆字之誤杆卽孟也漢書東方朔傳有安如覆孟語正與此同 拜經樓藏書題跋記隸釋桐鄉汪氏藏書

有展硯齋圖書印休甯汪季青家藏書籍二印記極精美 又本草衍義汪季青家藏面葉題摘藻堂藏 又蘇詩補注桐鄉汪氏藏本面葉題初白翁原稟擁書樓收藏並有梧桐鄉汪氏擁書樓所藏圖記 甯宋樓藏書志玉山名勝集有休陽汪氏裘杼樓藏書印

連屋書囊當屋簷碧雲窗外繞疏檐平生燕越皆桑梓此意 蕘翁未解拈 胡介祉循齋

鐵琴銅劍樓書目寓簡有胡茨村印 楹書隅錄宋本東萊博議有燕越胡茨村藏書印 經籍訪古志安南志略十九卷羽倉用九藏清黃丕烈從五研樓傳鈔本黃氏手跋曰是書原本爲胡茨村藏余所藏他書亦有胡茨村印

記必好書之人矣頃友人攜徐昂發詩中有題胡茨村畫  
象二首急錄之以著其人之時代并識茨村果好書者云  
金泥小字刻牙籤連屋書囊當屋簷盡日細繙黃白本始  
知閒味十分甜銀魚焚卻幾經春種竹開池寄此身窗外  
碧雲高百尺此君清態最宜人前一首可見校書之勤後  
一首可想閒居之樂昌熾案茨村名介祉字循齋山陰人  
宛平籍少保兆龍子由蔭生歷官河南按察使著隨園詩  
集詳見兩浙輶軒錄毛西河詩話載其趵突泉詩一首稱  
其詩盛爲當時所推竹垞嘗屬其刻宋本十家宮詞有序  
見集中其藏書印冠以燕越二字者以南人隸北籍故耳  
蕘翁皆未能知也

小詩愛展納涼圖銷暑橋頭過酒壺西雅還疑承雅誤南鄰

儻許結鄰無

陳昂書厓

嘉興府志陳昂字書厓官同知家梅里與朱彝尊父子居  
鄰並纂書亭集有同登澱山寺謁秦女祠分韻詩笛漁小  
橐有題其納涼圖一詩 笛漁小橐題陳書厓納涼圖杜  
甫南鄰也姓朱柴門月夜每招呼新來歸作詩人伴銷暑  
橋邊過酒壺 拜經樓藏書題跋記歛堂集古錄先君子  
云世傳刊本首敘卽闕文二百四十餘言而筆畫之訛舛  
尤不勝計昨歲陳仲魚得舊本迺新安陳書厓所鈔首  
一序旣全而字畫精好與刊本有毫釐千里之殊 又道  
園學古錄有陳氏家藏書厓珍祕陳書厓讀書記諸圖記

天祿琳琅前編明刻三禮攷注有湧石山房練江陳昂  
之印東阜先生後人天都陳氏承雅堂圖籍陳氏藏書子  
孫永保諸朱記續編元本冷齋夜話亦有陳書厓讀書記  
諸印 爾宋樓藏書志鐵厓樂府有天都陳氏西雅樓圖  
籍朱文方印東阜先生後人白文方印西雅疑承雅之譌  
愛石何如愛書癖一拳蒼潤琢宣和拈花影鬪維摩詰種樹  
方鈔郭橐駝 龔翔麟天石

杭郡詩輯龔翔麟字天石號蘅圃仁和人康熙辛酉順天  
副貢歷官御史有田居詩橐十卷田居詩續三卷注云晚  
年移家張駝園自號田居王石谷爲作田居圖 又金志  
章字繪卣號江聲錢唐人有江聲草堂集注云江聲居吳

山之麓高才博學爲龔蘅圃所重延課其子龔氏故多藏  
書能盡讀之 鶴徵前錄黃俞邵館江甯龔方伯署中與  
令子侍御蘅圃交最契龔藏書甲浙右所刻授經圖春秋  
纂例諸書經其校正者爲多 東城雜記玉玲瓏宋宣和  
花綱石也上有字紀歲月蒼潤嵌空叩之聲如雜佩本包  
涵所靈隱山莊舊物後歸龔侍御翔麟因以名其閣焉侍  
御爲太常卿佳胤子 拜經樓藏書題跋記紺珠集周耕  
厓跋云前有橫沙龔氏玉玲瓏閣珍藏圖記又有龔稼村  
祕笈之印校者爲田居爲江聲兔牀云稼村田居皆蘅圃  
先生自號江聲則金觀察志章別字蘅圃友也 笛漁小  
橐梁溪華胥爲蘅圃寫僧裝小影侍以雙女一拈花一捧

梵書取心經色空二語曰雙是戲題絕句云一雙天女玉  
差肩卑鉢羅花貝葉篇若使香門盡如此丁年儂亦願逃  
禪 又題蘅圃擔花圖山居要術如尋得種樹方應手自  
鈔

昔日堂中尊二老南雷爲師秦川父後日堂中尊二老竹垞  
爲賓高涼主 鄭梁寒村 子性義門

兩浙輶軒錄鄭梁字禹梅一字寒村慈溪人康熙戊辰進  
士官至高州知府著寒村詩文選 全祖望五嶽游人穿  
中柱文南雷黃氏之學先生表章不遺餘力先是尊府君  
高州欲立祠於家以祀南雷而不果先生成其志築二老  
閣於所居東以祀南雷及王父秦川觀察春秋仲丁祭以

少牢黃氏諸孫及同社子弟皆邀之與祭使知香火之未  
墜也四方學者訪求南雷之學不之黃氏而之鶴浦卽黃  
氏諸孫訪求簿錄亦反以先生爲大宗先生諱性字義門  
別號南溪浙之慈溪縣鶴浦人也以故按察副使溱爲祖  
世所稱秦川先生者也以故知高州府梁爲父世所稱寒  
村先生者也卒年七十九子二大節中節 又二老閣藏  
書記太沖先生最喜收書其搜羅大江以南諸家殆徧垂  
老遭大水卷軸盡壞身後一火失去大半吾友鄭丈南溪  
理而出之其散亂者復整其破損者復完尙可得三萬卷  
而如薛居正五代史乃天壤閒罕遇者已失去可惜也鄭  
氏自平子先生以來家藏亦及其半乃於所居之旁築二

老閣以貶之二老閣者尊府君高州之命也高州以平子先生爲父以太沖先生爲師因念二老交契之厚遺言欲爲閣以並祀之南溪自游五嶽還閣始成因貶書於其下昔者浦江鄭氏世奉潛溪之祀君子以爲美談今後鄭猶先鄭也而更能收拾其遺書師傳家學倍有光矣書目旣成爰爲之記 余集鄭拙齋墓誌銘五嶽游人生二子君其仲也諱中節字發之號拙齋侷儻負氣節讀書不屑章句 又云學者渡孝女江抵四明違鶴浦四五里外望見崇檐傑峙天際巋然與紫蟾山若揖者爲君家二老閣百年以來南雷之書海遭水火甬上遺老亦零落殆盡而君家遺籍獨完好如故流風餘韻髣髴猶能道之益歎鄭氏

爲善繼也 朱彝尊贈寒村詩高涼太守髯成絲病後偏工絕妙詞菜肚老人全硬語龍門柴木半枯枝後來領袖歸才子左手雲煙勝畫師別久重逢轉傾倒七言三復曉行詩 定香亭筆談鄭太守梁以曉行詩得名朱竹垞嘗贈以詩元孫簡香勳以墨跡示余余和之有云別擬建堂尊二老竹垞經義曉行詩簡香因建堂祀兩先生余爲書二老堂額簡香又畫二老重逢圖取竹垞別久重逢轉傾倒詩意昌熾案浙江通志梁善畫得末疾右體不遂以左手驅染如平時竹垞所云左手雲煙勝畫師也 謝振定知恥齋文集贈鄭簡香徵君序寒村先生之曾孫簡香以孝廉方正就徵至省垣訪余於南屏余亟問所謂二老閣

者故無恙而其所藏書半軼於 四庫採輯寫本還真之  
日後又不戒於火雖有存焉者僅矣顧簡香生七日而孤  
其母氏張育教之十有八年乃能嶄然見頭角延先人之  
清芬於不墜是藏書雖亡而實不亡爲可幸也已 倪大  
成登二老閣詩藏書自比遺金富師道原同祖德隆二老  
額懸光萬丈南雷鶴浦並高風

紅豆新移選佛場葑田北去有書莊一廛負郭三分水四世  
傳經百歲堂 惠周惕元龍 子士奇仲孺 孫棟定宇

鶴徵前錄惠周惕原名恕字元龍號研溪江南長洲人康  
熙辛未進士密雲知縣李富孫案研溪所居曰紅豆書屋  
在吳城東冷香溪之北吳郡東禪寺有紅豆樹相傳白鶴

禪師所種研溪移一枝植階前因自號紅豆主人 包世  
臣惠氏四世傳經圖跋惠氏後人世昭出其冊示余第一  
代爲明經律和先生名有聲原名爾節號樸庵明季以諸  
生貢成均第二代爲其子元龍先生第三代爲大令次子  
學士仲孺先生士奇別號半農第四代卽徵君棟爲學士  
之子世所稱定宇先生也又號松厓世昭字槃卿爲仲孺  
先生之元孫 昌熾案潘星齋先生墨緣小錄惠士昭磐  
卿山水學椒畦顏所居曰冷香別館予題二絕云花竹蕭  
疏屋數間冷香溪畔白雲環看君潑墨淋漓處如見江南  
雨後山故園指點畫圖中家學爭推鄭小同最羨忘庵留  
妙筆一株紅豆倚東風磐卿之名一作世昭一作士昭兩

君皆親見當是記憶偶誤 錢大昕惠先生棟傳先生自幼篤志向學家多藏書日夜講誦雅愛典籍得一善本傾囊弗惜或借讀手鈔校勘精審於古書之真偽瞭然若辨黑白 朱彝尊題惠周惕紅豆書莊圖一入畫圖看便好城居僻似沈尤村又云他日招邀葑田北一帆風飽似張弓 翁方綱題王文簡載書圖松厓昔侍研溪談祕笈師門一百三今日新城訪耆舊巾箱著錄果誰堪自注惠定宇所錄王氏書目凡一百三種 持靜齋書目乾象變異錄一冊有惠棟定宇紅豆山房所收善本諸印 惠氏百歲堂書目三卷見蘇州府志

天上圖書補石渠涓流撮壤比何如漁洋衣鉢猶存否鐵拐

斜街有故廬

黃叔琳崑圃

子登賢雲門

勵守謙子大

國朝先正事略黃叔琳字崑圃順天大興人康熙三十年一甲三名進士乾隆辛未重赴瓊林以文學政事受知

三朝當代推爲鉅儒天下士識與不識皆曰北平黃先生弟叔琬叔琪叔璫子登賢字雲門官至漕運總督兵部尙書 竹葉亭雜記靜海勵文恭公杜訥少嗣於杜家故姓杜後欲歸宗不知其姓 仁皇帝特賜姓勵大

司寇廷儀其子也少司寇宗萬其孫也曾孫翰林守謙字子大 郎潛紀聞四世翰林者靜海勵杜訥康熙庚戌子廷儀庚辰孫宗萬辛丑曾孫守謙乾隆乙丑 四庫全書總目乾隆三十九年五月十四日奉 上諭廷臣進

書如黃登賢紀昀勵守謙汪如藻等俱藏書舊家並著每人賞給內府初印之佩文韻府各一部俾珍爲世寶以示嘉獎 翁方綱送黃忍廬都諫視學山東詩壁簡千年新

詔輯堂開萬卷舊家風又云重訪漁洋書庫在娟娟香祖又成叢自注尊甫崑圃先生於康熙庚寅視學山東刻漁洋詩話崑圃漁洋門人也 無事爲福齋隨筆黃崑圃先生萬卷樓故居在京師李鐵拐斜街

比似王筠愧未工屠龍餘技到雕蟲白頭那得兒曹健且割烏雞療病風 查慎行悔餘 孫岐昌藥師

全祖望查先生墓表先生名嗣璉字夏重別署查田改名慎行字悔餘別署初白浙江海甯人康熙壬午 聖

祖東巡召至

行在賦詩入直 南書房明年

特賜進士出身改翰林院庶吉士授編修時公族子昇以宮坊久侍直宮監無以別之呼先生曰老查 海昌備

志查岐昌字藥師一字石友號巖門山樵慎行孫克念子諸生 蒲褐山房詩話藥師著巢經閣讀古記 初白先

生敬業堂集輓呂晚村詩屠龍餘技到雕蟲賣藝文成事 事工 又鈔書三首人言冬是歲之餘自分生涯伴蠹魚

比似王筠猶有愧白頭方解手鈔書無數空花亂眼生摩挲細字欠分明西洋鏡比傳神手八廓重開爲點睛烏雞已療病風手秋兔猶存見獵心炳燭餘光吾若此兒曹那不惜分陰 天祿琳琅新唐書糾繆宋刻查慎行藏有得

樹樓藏書 南書房史官海甯查慎行字夏重又曰悔餘  
三印 鐵琴銅劍樓書目刑統賦解藏海甯查氏有臣名  
岐昌字曰藥師朱記 持靜齋書目龜溪集十二卷有乾  
隆庚午巖門山樵查岐昌跋

寫書相約到蓬山麥飯蔥湯互往還西市從容彈一曲廣陵  
散未絕人間 李紱巨來

全祖望臨川李公神道碑銘公以己丑進士入詞館授編  
修遷至直隸總督下獄當誅尋奉 詔赦令纂修八  
旗志書杜門八年授戶部三庫侍郎左遷詹事以閣學致  
仕公諱紱字巨來學者稱爲穆堂先生又云公天性好士  
取放翁詩題楹曰遠聞佳士輒心許老見異書猶眼明蓋

實錄也 又南昌萬公墓誌銘臨川李侍郎居宣武門南

西有紫藤軒以居萬公孺廬又割其東以居予每日高春  
必相聚一室蔥湯麥飯互爲主賓 又鈔牙樂大典記是

書副本貯翰林院無過而問者臨川李公始借觀之余因  
與公定爲課取所流傳於世者概置之卽近世所無而不  
關大義者亦不錄但鈔其所欲見而不可得者夫求儲藏  
於祕府更番迭易往復維艱而吾輩力不能多蓄寫官自  
從事於是書每日夜漏三下而寢可盡二十卷而以所簽  
分令四人鈔之或至浹旬未畢則欲卒業非易事也 袁  
枚臨川李公傳 世宗惡其崛強欲摧折之兩次決  
囚皆縛至菜市宣 旨赦還公博聞強記藏書五萬

卷手加丹黃其宏綱巨旨都能省記刑部郎中楊某欲試  
公故於押赴市曹時探問經史疑義公對赭衣白刃應答  
如流楊退而告人曰李公眞鐵胎人也

坊南花竹秀而野插架青紅屋高下夢中昨見古衣冠或立  
而盱或拜者

顧嗣立俠君

乾隆蘇州府志顧嗣立字俠君子咸子康熙己卯舉順天  
鄉試壬辰進士選庶吉士 朱彝尊秀野堂記長洲顧俠  
君築堂於宅之北閭邱坊之南壘石爲山望之平遠也捐  
溝爲池卽之蘊淪也登者免攀陟之勞居者無塵壒之患  
於是插架以儲書义竿以立畫置酒以娛賓客極朋友晷  
弟之樂暇取元一代之詩甄綜之得百家焉業布之通都

矣俠君乃夢有客愉愉有客瞿瞿一一十十容色則殊或  
俛而拜或立而盱覺而曰是其爲元人之徒歟將林有遺  
材而淵有遺珠歟乃借鈔於藏書者復得百家焉未已也  
博觀乎書畫旁搜乎碑碣眞文梵夾靡勿攷稽又不下百  
家而元人之詩乃大備矣昌熾案嗣立元詩選初集六十  
八卷二集二十六卷三集十六卷又癸集若干卷 彝尊  
又有題秀野草堂詩云秀野堂深曲徑通巡檐始信畫圖  
工小山巢石屋高下清露戎葵花白紅已許糟邱成酒伴  
不妨蠹簡借郵筒入秋準踐登臚約吟徧江橋兩岸楓  
又韓葵詩甲乙千峰石青紅四部籤 士禮居藏書題跋  
記周此山詩集有俠君圖記又有閭邱小圃及秀野草堂

顧氏藏書印二朱記

脫釧難求本二千莊池玩劇亦論錢長林結得胡盧隱先署  
庵名號鹿眠

林佶吉人

東越文苑傳林佶字吉人號鹿原康熙三十八年舉於鄉  
五十一年

欽賜進士授內閣中書家多藏書徐乾

學鏡通志堂經解朱彝尊選明詩綜皆就傳鈔有樸學齋  
集子正青字洙雲莪字涪雲昌熾案樸學齋稟校字題名  
男正青在衡在峨玉衡共四人 鮑鈺汪鈍翁說鈴跋雍  
正八年借紫幢王孫本手錄一通原本乃林舍人正書留  
贈王孫者有長林二字胡盧印記面葉八分書說鈴二字  
後有臣佶之印吉人之辭二朱記 樸學齋稟上御史某

公書某海陬賤士荒學無狀年來過不自量購求儒先集  
錄毋慮數千卷幾復齧峰徐氏之舊而家亦緣是愈貧荔  
水莊池半屬他姓 又青兒得齧峰徐興公遺書五十餘  
種錄其目與跋寄至京邸喜而有作并示畧兒平生愛書  
癖垂老未能釋譬如饜飧人流涎嗜肥炙又如聚斂者銖  
錙務拮據自晒炳燭暮時光如駒隙何苦獮祭勞甘此蠹  
齧冊結習顧難除把卷欣然適每嘗語兒輩胸次勿迫窄  
學當貫古今義須本經籍壙觀前輩賢孰不典墳索吾鄉  
海濱隅見聞終扞格若非事詩書何由展尋尺曩哲謝與  
徐勤錄肆探蹟精騎裒萬餘祕本購千百市朝忽改移籤  
帙旋遭厄甗覆固堪虞部分亦足惜予時丁盛年志欲奮

六翻念惟富縹緗始足恣論覈適有宛羽遺許以十城易  
亟脫汝母釧佐以古玩劇煌煌二千本奕奕充余宅貧兒  
暴得富匹夫竟懷璧環堵古香叢插架文光射終藉此先  
資乃竟成麗澤廿年客京華不至迷阡陌策勳固在茲詒  
謀詎用教兒能繩父志好尚無頗僻所敦在芸編光陰恐  
虛擲每當寄書來老父嘗啞啞昨復致二紙快意說新獲  
書是徐氏遺字是鼇峰迹圖印識收藏題跋詳細釋四十  
七種書百十年閒隔一旦歸書囊如揖重來客老夫聞之  
喜懽酌雙浮白遺金縱滿籛何如萬卷積久宦輒傷窮穎  
禿不耐畫惟有教兒孫冀牙書香脈兒解藏書好自受讀  
書益長林蔚松楸藤朶紛蘿薜老夫懷歸來展書樂晨夕

又青兒南歸詩以遺之曾過虞山明發堂山形磅礴似  
家鄉規模未便成堂構且作長林山上莊 又欲成一隴  
埋吾骨先署庵名號鹿眠

茶社未忘銅井約草堂比似玉山靈家藏四世以身守誰得  
吾書視此銘 蕭夢松靜君

天祿琳琅明刻六子全書有蕭蓼亭印昌熾案潘氏滂喜  
齋藏明刻劉屏山集前有朱文大方印刻藏書銘曰名山  
草堂蕭然獨居門無車馬坐有圖書沈酣枕藉不知其餘  
俯仰今昔樂且宴如蕭蓼亭銘又有蕭蓼亭四世家藏圖  
籍印又有以身守之罔敢失墜印又有蕭印夢松及靜君  
二朱記其人本末不可攷惟林鹿原樸學齋稟有送蕭靜

君之吳詩鄧尉梅花銅井茶扁舟曾共宿僧家雲巖辛夷  
長蕩柳山樓長把杯中酒去年行樂惜無詩今日送君還  
此時平生最愛江南景一曲孤桐繫別思又許旭閩中紀  
略云閩中巨室藏書不少偶見蕭御史震家所藏書目厚  
六七寸內中多有未覩則知蕭氏爲閩中藏書舊家靜君  
在康熙中嘗游吾吳但與御史輩行先後未詳

向秀書爲郭象竊葛洪記亦吳均編迺知賚爾敬游研未必

眞出方瞳仙 何焯配瞻 弟煌心友

全祖望長洲何公墓誌銘公篤志於學讀書繭絲牛毛必  
審必核吳下多書估公從之訪購宋元舊槧及故家鈔本  
細讐正之一卷或積數十過丹黃稠疊而後知近世之書

脫漏譌謬讀者沈迷於其中而終身未曉也 聖祖

仁皇帝聞其姓名 召直南書房尋 特賜甲

乙科入翰林是時諸王皆右文朱邸所聚冊府多資公校  
之以康熙六十一年六月九日病卒其門人陸君錫疇曰  
吾師最謹慎不肯輕著書苟有所得再三詳定以爲可者  
則約言以記之積久遂成道古錄如千卷乃同門有荷吾  
師嘘拂之力而晚背之者竊其書去今遂不可得是一恨  
也年來頗有嗜吾師之學者兼金以購其所閱經史諸本  
吳估多冒其跡以求售於是有何氏僞書而人莫之辨又  
一恨也公諱焯字杞瞻晚號茶仙先世曾以義門旌學者  
稱義門先生父棟諸生子壽餘 長洲縣志何焯康熙乙

丑拔貢壬午冬以李文貞公光地薦

特賜舉人癸

未會試下第再

賜進士選庶吉士

方榮如何先

生墓誌銘初字潤千哭其母更字祀瞻 沈彤何先生行

狀先生蓄書數萬卷參稽互證於其真偽是非皆有題識

如別黑白其校定兩漢書三國志最有名乾隆五年寫其

本付國子監爲新刊本所取正 義門集與友人書家中

偶起三間小屋適獲文待詔所用圓研殊不下墨底有八

分賚爾敬游翰墨之用華陽隱居十二字相傳陶貞白十

賚文中第九是研卽其故物因名之曰賚研齋 又賚研

齋歌槃槃紫石大圓研栖靜賚自方瞳仙八分十二銘其

背歲久大半缺且剝 昌熾案先生弟煌字心友號小山

三徑家風比杜暹

嘗自署何仲子義門題跋或署承筐書塾或署語古小齋  
又自號憩閒主人見甯宋樓藏書志賓退錄跋百宋一廛  
賦注何義門用小方章其文曰髯

賜書高擁鄰侯籤荒涼松菊圖重繪想見廉州太守廉 蔣杲  
子遵 蔣重光子宣

江南通志蔣杲字子遵燦四世孫康熙癸巳進士歷戶部

郎中出知廉州府 婁關蔣氏家譜杲文涵第四子號篁

亭生於康熙癸亥卒年四十九著有挹秀于京諸集 又

重光文源第四子字子宣號辛齋府庠增貢生生於康熙

戊子卒年六十一著有賦琴樓遺槩缶音小草巖語集

沈文懋蔣辛齋傳辛齋試北闈臥貼地寒溼之氣入於肌骨艱於起臥垂十五年雖絕意進取然潛心稽古手難展書令僕執卷仰視深夜懸燈帳中不輟蘇州府志蔣司馬宅在飲馬橋北兵部侍郎蔣元益所居中有貯書樓何焯嘗授經於此元益之父廉州太守杲焯之弟子也昌熾案杲兄棟字子範亦義門弟子又蔣重光藏書甚富乾隆三十八年詔開四庫館徵四方書時重光已沒子曾瑩檢其所審定祕書百種進御天子嘉之救賜佩文韻府一部親製七言詩書於所進職官分紀之首美其好古復惜其不遇人莫不榮之士禮居藏書題跋記郡中賜書樓蔣氏有宋刻三

謝詩書友呂邦惟攜來楮墨古雅洵爲宋刻上駟卷端有郭氏木葉齋鑒定宋本九字末有篁亭墨蹟又曰乙卯被災此書賴神物護持得以無失近作再續得書十二圖以此列入名曰三徑就荒蓋猶不忘篁亭之遺也陳汝楫送蔣子遵下第東歸詩好友頻來書滿屋人間得失總悠悠

使者輶車塞巷涂到門僣從認懸壺爲求靈藥醫書癖吳市頻來問扁盧

陸謬其清

漁洋居易錄竹垞說吳門陸醫士其清家有洪炎玉父集元人稅汝權易啟蒙小傳顧阿瑛玉山雅集又阿瑛選張伯雨詩皆毛氏刻十元人詩所不載何焯跋柳仲塗集

陸君其清不輕與人通假書籍倦圃竹垞兩先生欲鈔錄其藏本亦必卷數葉數相當始得各易所無 翁方綱跋朱性甫珊瑚木難手稟有何義門致其翁一帖其翁者吳門陸醫士號其清所居聽雲室鑿藏圖籍甚富義門嘗往觀之卽此一小札亦吳下藏書家故事矣 又題劉完庵雲樹小幀吳下醫翁富祕文顧何侈說綠氤氳始知不是松泉響果有山齋號聽雲自注往時吳門陸醫士其清與顧維岳何屺瞻游多蓄古圖書金石號聽雲室余初不解雲何以聽今乃借完庵此幀發之 持靜齋書目佳趣堂書目陸濬撰卷首有置書年分自康熙十四年至雍正八年有自序 其清佳趣堂書目自序子年九歲偶於篋中

得蠅頭細書一冊乃先大父手鈔歷朝名文後書子幼時無書可讀借於人鈔錄而讀者今人有書而不思讀哀哉讀之悚然自十五歲家貧失學喜借書晝夜鈔寫嚴寒乏炭屈足腹下冷煖交換見者匿笑鈔書一葉於古書肆易刻者五葉購書歸端貯几上揖而後藏年二十得顧仲瑛玉山雅集元刻文待詔舊藏也萊陽姜友偶聞之於樵李曹秋岳侍郎侍郎云陸兄有此或典或售無所不可不然當致慕中丞丁方伯轉借予謂此非禁本不介意堅卻之於是侍郎來晤歡若舊識過吳艤舟方定身先垂訪每謂山陰人曰陸生有隱操吳門第一流也甲子歲以魏仲先鉅鹿東觀集孫奕示兒編宋本見贈歲辛酉秀水朱竹垞

檢討典試江南亦造門訂交晚選詩綜有關來借二先生  
往來尺牘不下四五十番夔州唐鑄萬日陸氏子孫觀侍  
郎之手蹟守祖父之遺書黽勉誦習必有以文章經術顯  
於世者此其清貽後之深心也內有宋元刻本宋元人鈔  
本明賢錄本名賢彙本出自閩閣公卿家者郡城故族舊  
所收藏者皆傳流有自與坊本迥異竭六十餘年之心血  
雖不敢自謂成一家之書實生平志之所屬故至老而不  
倦也丁酉端陽後十日書於清目處平原陸謬時年七十  
有四

牛耳毛錢狎主盟黃山珍本出書城釀花掃葉皆清課坐擁

寒氈對短檠

席鑑玉照

黃廷鑑愛日精廬藏書志序汲古毛氏述古錢氏兩家陵  
替吾邑藏書之風寢微然亦未嘗絕也以余所聞玉照席  
氏慶曾孫氏虞巖魚氏皆斤斤雪鈔露校衍其一脈惟多  
留心於說部小集以一二零編自喜而於經史轉略士  
禮居藏書題跋記顧抱冲案頭有影宋本東家雜記末有  
榮萸山人席鑑跋云毛省庵先輩影寫本余於丙申仲夏  
得之汲古閣中 天祿琳琅離騷草木疏虞山席鑑鈔本  
有墨妙筆精虞山席鑑玉照氏收藏朱記 又續編班馬  
字類有席鑑之印學然後知不足朱記 楹書隅錄影宋  
鈔五經文字九經字樣每冊有趙宋本墨妙筆精希世之  
珍虞山席鑑玉照氏釀花草堂諸印 昌熾案玉照藏書

極富所刻古今書籍板心均有埽葉山房字余曾見所藏  
寶晉山林集有莢山珍本印又按海虞詩苑席鎬詩有湘  
北寶箴玉照讀書敏遜齋猶記十五年前余亦嘗偕對揚  
敬修居之因題示二首小齋罷琴酌羣季尙嬰孩此日開  
青案頻年閉綠苔寒氈我家物春草惠連才絃誦遙相接  
惟餘叔子哀其第二首云三人連袂衽萬卷浩縱橫一門  
羣從讀書爛古蓋不減孫錢二氏矣

吾愛詩人孫寶洲芒鞋日日訪彬侯家書亦比牛腰大梵志  
山經自校讐

孫淇寶洲

海虞詩苑孫淇字寶洲號竹鄉孫氏自西川先生以來以  
詩世其家君繼之宗仰蓋在白蘇兩家昌熾案淇有市肆

蓄書歌爲曹彬侯作云吾生嗜好類蠹蟬此外都非性所  
喜先業於今說如夢教授生徒豈得已浮沈薄俗淡世味  
一卷未能輕脫屣又歲暮書懷云書載牛腰徒壓擔詩餘  
雞肋未成編是亦嗜古振奇之士矣 陳祖范孫竹鄉哀  
詞不踏名場專精文藝祕書可行便腹可笥錢用買文尊  
開問字或纂或修山書梵志 鐵琴銅劍樓書目元氏長  
慶集孫竹鄉校過後有題記云戊申六月三十日用董思  
翁本校

一匱遮門充閣庋一廚連屋當屏風襟裾牛馬人閒世尙有  
曹生隱市中

曹炎彬侯

顧廣圻清河書畫舫題後常熟嗜手鈔者陸敕先馮定遠

爲極盛至彬侯殿之彬侯名炎席氏客也 孫淇市肆蓄  
書歌爲曹彬侯作云我怪曹生市廛裏偏仄喧囂擁文史  
一廚連屋當屏風一匱遮門充閣庀叢殘斷缺勤購買猶  
禿千兔寫萬紙吁嗟市隱類古人令我長懷顙流此世人  
有書不肯讀問之不荅我能揣温飽嬉閒事游蕩飢寒齷  
齷憂妻子昏昏索索年復年牛馬襟裾略無恥又云曹生  
曹生負此癖奚翅巨擘挺眾指漫道亡羊均博塞畢竟臧  
穀誰非是河東街頭具五民厚資奇貨來千里平生心跡  
厭喧雜市道經年罕投趾羨爾家藏萬卷餘下簾終日憑  
棊几茗杯香篆伴寂寞大嚼快意何煩爾從今借書數還  
往不惜踏穿東郭履 拜經樓藏書題跋記武林舊事鈔

本前有鶴溪主人笠澤曹炎之印彬侯四圖記

打鼓排衙花簾鋪闖然文采老於菟達人何必推書識瑣瑣

昌英二十廚

李馥鹿山

鄭杰昌英

劉筠川

沈文慤送李鹿山大中丞歸里序福州李公弱冠爲名孝  
廉旣仕官西曹以守法稱出任憲副於蜀移轅江左旋任  
臬事晉方伯開府於浙解組去官留滯吾吳十有四年丁  
巳夏歸福州公去家三十年一旦仍返故鄉遨遊九仙烏  
石南江西峽之閒其樂何可涯量 郎潛紀聞泉州李中  
丞馥撫吾浙時收書極富一時善本齊入曹倉每冊皆有  
圖記曰曾在李鹿山處後緣事頌繫羣書散逸人以爲印  
文之識然亦達已 昌熾案田肇麗有懷堂集有述懷東

李鹿山詩西曹各專司繁劇江南首又云閩海有李子同  
事稱快友文采老於菟聲價等瓊玖是鹿山仕刑曹嘗分  
江南司又有送李鹿山出守重慶詩四首其二云山翠官  
齋映排衙打鼓齊堂開花簾覆聲動午觴啼 儀顧堂元  
槩晏子跋每冊有鄭杰之印注韓居士鄭氏注韓居珍藏  
記印案鄭杰字人杰侯官人乾隆貢生其藏書之所曰注  
韓居藏書數萬卷分二十厨貯之以東壁圖書府西園翰  
墨林誦詩聞國政講易見天心爲誌又元槩藝文類聚有  
曾在李鹿山處朱文長印鄭杰之印一名人杰字昌英侯  
官鄭氏藏書注韓居珍藏記劉氏小墨莊藏侯官劉筠川  
藝文金石記曾經筠川讀諸印李鹿山鄭杰劉筠川皆康

雍乾間福建藏書家又影宋酒經跋有鄭杰之印昌英珍  
祕朱文方印 甯宋樓藏書志九靈山房集有鄭氏注韓  
居珍藏記鄭赤之印案赤當爲杰之誤杰一名人杰字昌  
英有印文可證前陸跋中以人杰爲杰字亦誤

墨光紙色問蕘夫已析能還舊合符七十七人金石契不教  
偶著一屠沽 王聞遠聲宏

士禮居藏書題跋記藏春集有蓮涇跋云康熙歲壬寅三  
月借婁東宋氏鈔本再校於孝慈堂之東窗蓮涇王姓聞  
遠其名聲宏其字蓮涇又其號也有孝慈堂書目傳世  
又續錄余所收王蓮涇家書最多皆得於其族孫處猶是  
家藏未散本也就中有孝慈堂書目分門編類敘次頗詳

以之求蓮涇所藏雖久散之本按其冊數之多寡紙色之黃白幾如析符之復合可知書籍貴有源流也 蓮涇孫元理元音跋是書借鈔於竹垞朱先輩歲辛丑偶得石君葉先生錄本遂力疾讐校補寫闕葉於溽暑中日揮汗三斗弗顧也蓮涇學人識於四美軒之西窗 東湖叢記蓮涇居士王叔子著有金石契言敘其知交七十七人皆畸人逸士 昌熾案蓮涇亦吾郡人而宋樓藏書志南唐書十八卷蓮涇題云雍正歲戊申陽月校於采蓮涇之孝慈堂灌稼邨翁王聞遠識時年六十有六以此推之蓮涇生年當在康熙二年癸卯也又鐵琴銅劍樓書目楊仲宏詩有王蓮涇鈔書記朱印龜巢橐蓮涇題校於率真書屋之

南窗

玩易兼山得良爻秫田可種謝懸匏陶元亮喜留賓飲庾仲容還哀子鈔 張位良思 子德榮充之

李果青芝山堂飲酒記友人張子良思有異才志趣高遠官直隸新樂令歸居城東葑溪之上戊午秋七夕前一日招致故交四五人飲酒青芝山堂山堂爲明襄毅韓公故園良思新葺之疊石爲山雜樹茂密旁有荷池康熙中良思以詩賦 召試給札 內廷修書書成出爲令和而有守歸而治薄田種秫暇則鈔宋元人小集聽二子讀書意恬如也昌熾案長元吳三邑科第譜康熙五十六年丁酉科副榜有張位字良思新樂知縣諸生譜三十三年

甲戌邵宗師歲試入學義門弟子姓氏錄有張位字立人  
卽其人也 士禮居藏書題跋記桂林風土記郡先輩張  
青芝手鈔卷端鈐張位小印書法工秀讀書者之藏書斯  
爲善矣又有吳枚庵鈔本張青芝子充之與枚庵友善故  
得借鈔 顧承吳門耆舊記張德榮字充之號伊蒿長洲  
縣學生家貧力學平生好古書手鈔數百卷藏於家子感  
舊詩云講席鈔書不計貧愚愚真是葛天民家風疏水尋  
常事留得心香一點春予少時嘗問業焉 韶宋樓藏書  
志隱居集張立人寫本有手跋云聽雲陸氏借錄乾隆元  
年嘉平朔日青芝

風水碑旬送桔槔金閭亭亦似勞勞韋公祠下摳衣拜敬爲

平園薦泚笔

宋定國賓王

錢枚方蔚

顧夏珍

東湖叢記王聞遠金石契言敘知交七十七人中言宋蔚  
如名賓王起家市井性嗜奇書無力購弄則百方丐鈔惟  
以搜羅遺佚訪求放失爲事鰥居無子憑權奇以餬口  
士禮居藏書題跋記吳都文粹宋賓王校本賓王本賈人  
而藏書之富校書之精眞讀書人不過 又云賓王所校  
龜巢集苦心讐勘精當無比 賓王周益公集跋益公集  
二百卷宋槧旣湮世無嗣刻近世之士得其殘編斷簡皆  
奉若拱璧吾婁顧子夏珍手鈔僅得七十二卷謂余此集  
向藏玉峰近聞歸郡人王聲宏矣若得從之補闕訂譌亦  
快事也言已浩歎康熙壬寅武陵暴卒春仲有書賈自郡

來言王聲宏先生欲借校吳都文粹余遂欣然與偕凡三及門時值清和暑長人困逡巡郡邸進退失據乃就韋公祠卜筮兆吉復詣得見請觀益公全集凡二十七種時錢子方蔚館於金閶余卽歸攜顧鈔往請補於先生先生具述督學某公曾遣繕書者就舍鈔成而去旣而復請許就校時與先生披閱見有差謬相爲訂正喜動顏色戲謂余曰孺子可教也予起謝詰朝復同錢子往先生遂出集首兩種錢子留校省齋余持平園以歸時夏五哉生魄也鈔對訖再詣見先生略無難色但臨行頻屬鄭重又借別稟詞科掖垣玉堂政府五種歸蓋六月將晦矣七月二十日順風揚帆亭午抵蘇冒暑入城易厯官奏議奉詔承明四

種還邸日猶未銜山旅客喧闐喘吁揮汗財貨之外別無所事事而余心獨喜無寐宵雨達旦風自西颺放舟中流食頃入黑甜鄉聽風水桔槔聲相送而篙師又報維舟矣鈔竟復往易親征龍飛歸廬陵閒居游山奏事南歸毘陵玉堂雜志二老堂詩話雜志玉藥辨證樂府凡一十二種歸校迨竣還謝則爲十月中旬云念武陵始事不獲見其成爲憾然其長君開之於衰絰中猶欲纂成先志而哀毀過中又弱一个時癸卯正月二十四日乙巳距武陵忌辰祇二十一日哀哉武陵存日不獨收藏甚富而手鈔祕本充盈篋笥尤喜人借鈔蓋武陵之心公心也昌熾案此跋見東湖叢記備錄於此以見古人嗜書如性命可敬可愛

據蓮涇言蔚如名賓王然攷蕘圃藏春集跋稱婁東宋定國賓王又似其人名定國而賓王其字蔚如又其號也方蔚名枚與賓王善余見菰里瞿氏藏秋厓小彙有賓王題字云康熙辛丑同錢枚方蔚閱張氏藏書志吳都文粹有好學真賓王之友矣文粹又有謝浦泰跋云宋蔚如購得此書與錢方蔚以王相國家藏宋本吳郡志及毛刻吳郡志參互攷訂凡數十次遂成善本書此以明二蔚之苦心也

史例龍門溯導觴蕉園已改睦親坊鬻書又苦無真眼斷送雞峰普濟方

浦見龍起潛

許仲堪眉岑

士禮居藏書題跋記普濟方

卷無錫浦姓書賈卽浦

二田之後此書有錫山浦氏珍藏印又有浦氏蕢菽賞鑒印當亦二田家藏者二田故多宋本書後人不知盡皆散失余向年曾得楊倬注荀子錢佃本二程遺書俱由浦姓賤售於某坊某坊以歸余者也 昌熾案二田先生史通

通釋二十卷爲讀史之津梁前有舉要門人梅里蔡焯爲

之撰舉例自題南杼秋浦起龍二田釋 橋西雜記嵇氏

承咸梁溪書畫徵言其鄉許氏富藏書有許眉岑仲堪者

注放翁詩甚詳眉岑與鮑若洲汀交善乾隆嘉慶間人也

安廣布山采土風斤圓水與鬱林通市中倘見弦唐子定怪

載書此寓公

王孝詠慧音

天祿琳琅續編通鑑紀事本末宋板元印有王印孝詠慧  
音兩朱記 楹書隅錄宋本章蘇州集有王孝詠印慧音  
太原仲子後海學人各印 昌熾案士禮居藏書題跋記  
汪水雲集亦有王孝詠慧音藏書印慧音先生事蹟不見  
於郡志惟攷長元吳三邑諸生譜康熙四十八年楊宗師  
歲試吳縣有王孝詠王惕夫淵雅堂集有嶺西雜記序云  
嶺西雜記者吾鄉王慧音先生孝詠居嶺西時所作也先  
生爲諸生久不利出而客游與故長沙陳恪勤公相厚善  
公歿而先生巋然享大年當雍正乾隆之間大有名

門外香溪送客帆氛氲花藥滿靈巖池塘猶繞孤山夢兄弟

何嘗痛不咸

吳銓容齋  
來竹嶼

子用儀拙庵  
元潤蘭汀

英簡舟

成佐嬾庵 孫泰  
曾孫志忠有

堂

吳志忠璜川吳氏經學叢書緣起璜川者吾曾祖容齋先  
生自題其書屋之名也曾祖於雍正年守吉安歸田後居  
瀆川遂初園讀書其中架上萬卷皆祕笈也所以題書屋  
曰璜川者以我曾祖生於新安之璜源隨我高祖鄉賢公  
僑居松江之上海老而自松遷蘇以故里題其讀書處懷  
舊之思也是時載酒問奇而來者如惠松厓徵君輩盡吳  
下知名士而我家遂以璜川吳氏著矣曾祖歿後我祖最  
幼故無如書籍之散逸若北宋本禮記單疏今歸曲阜孔  
氏者其最顯者耳我祖嬾庵先生重自蒐羅書樓三楹環  
列四周有樂意軒書目四卷嬾庵偶存彙八卷讀史小論

二卷行於世昔人論藏書有二一則聚書者之藏書一則讀書者之藏書如我祖非所謂讀書者之藏書歟然樂意軒所藏書至今又分析遺散矣家君獨好甲部書著有經句說二十餘卷其續者正未央也 顧廣圻呂衡州文集序吳茂才有堂家藏足本有堂名志忠先世在吳中負藏書望所謂璜川吳氏者也 陳奐師友淵源記吳志忠字有堂與余爲中表昆弟簡舟先生名英篤學年八十著有經句說四卷有堂承庭訓又與同郡黃蕘圃顧澗蘋交游故長於目錄校勘之學 湖海詩傳吳泰來字企晉號竹嶼長洲人乾隆二十五年進士內閣中書有淨名軒集 蒲褐山房詩話企晉大父吉安太守銓歸築遂初園於木

瀆雲林杏靄花藥參差其尊人用儀復購書數萬卷於其中多宋元善本遂與江浙諸名士流連觴詠座無俗客既而兄弟爭析產出藏書而貨之并售其園 陳鱣經籍跋文宋本禮記注疏向爲吳門吳拙庵行人所藏傳其子企晉 聽秋聲館詞話王蘭泉司寇琴畫樓詞鈔獨遺吳蘭汀大令元潤香溪瑤翠詞豈因其中歲閱牆薄而屏之耶大令長洲人官衛輝知縣爲竹嶼中翰弟其園居春晚有懷竹嶼兄時客武林祝英臺近云歎離索幾回夢繞池塘相思渺難託夜雨連牀空憶舊時約思君門掩孤山倚闌吟徧對滿院楊花飄泊是其始非不怡怡也 平津館鑒藏書籍記唐四傑詩有吳元潤印澤均長洲吳謝堂氏香

兩齋珍藏書畫印朱記又陵陽集有謝堂香雨齋吳氏珍藏圖書朱記開有益齋讀書志金陵六朝記二卷唐尉遲偓纂勞君平甫得明嘉靖辛丑啟山山人校閱樂意軒吳氏藏本持靜齋書目歷代傳國世次有璜川吳氏探梅山房印又東萊集有樂意軒吳氏藏書印昌熾案以上諸書璜川吳氏藏書始於吉安太守銓卽所稱容齋先生也用儀號拙庵成佐號懶庵皆銓之子英字簡舟成佐之子與竹嶼蘭汀爲從昆弟有堂則英子也澤均當爲元潤之字謝堂亦其別號又按粵雅堂叢書中吳紀聞妙道人跋下有志忠小印則妙道人者當爲有堂之號詎宋樓藏書志嵇康集有道光十五年妙道人一跋亦志忠筆也

唐書宰相世系表史游姓氏急就篇華陽仙裔牽連錄猶及斯文未墜年顧若霖雨時孫珊聽玉顧至於山

士禮居藏書題跋記余向聞任蔣橋顧氏有宋刻吳郡志倩人訪求得諸華陽橋顧聽玉家華陽卽任蔣分支也聽玉之祖雨時先生喜蓄異書手自讐勘其舊鈔續圖經有跋云雍正十二年夏五月旣望於崑山徐氏購得葉文莊藏本校一過又云棠陰比事藏試飲堂顧氏顧名珊號聽玉余素與之好其所藏閒亦歸余陸恭越州石氏帖跋余爲館甥於武陵外舅復庵先生諱自名字明善尊甫可潛先生諱霖字雨時號不淄道人博學多聞搜訪法書名畫宋刊書籍復庵公繼之藏古之名聞於吳郡昌熾

案楹書隅錄舊鈔本說文韻譜有武陵懷古書屋收藏印  
記顧若霖印雨時樂幽居士各印鐵琴銅劍樓書目寓簡  
有顧若霖朱筆記云康熙辛丑孟冬日校合之續圖經跋  
知其人當在康雍間蕘圃硯箋以試飲堂顧氏本校其跋  
中又稱顧侍萱茂才侍萱聽玉之子余曾見韓履卿崇白  
雲無盡圖有顧翔雲題詩韓氏後人告余云侍萱卽翔雲  
之號桂舫尙書廷主家塾履卿先生爲其中表尊行而又  
受業者也任蔣橋顧氏主人號竹君見蕘圃宋本管子跋  
又騎龍巷顧氏名至見汪水雲詩跋王勝之同年藏程念  
鞠鄧尉探梅圖顧至題詩自署於山有結客皆老蒼一印  
雞廳豕零各有須癡愚未必竟癡愚充閩三館讐書日失卻

智珠說世珠

顧階升步巖  
子榿肇聲

子應昌桐井

顧潘方水

潘

何堂顧步巖小傳君諱階升字步巖家故素封獨無所慕  
惟以圖籍法書名畫自娛樂書齋之內縹緗插架者萬餘  
卷遇一編實能挹其精華并識其刊刻鈔錄收藏所自賈  
客挾冊至門者君爲審眞贗品高下判若黑白無不相顧  
愕眙以去和叔陳君病宋史之繁而臨川舊本及祥符王  
損仲橐本皆不傳也欲重刪修以成一家言而苦攷證之  
書不具備君按其目所徵求者悉舉畀之其通懷樂易如  
此年五十患痰厥來年八月遂以死子積應麟 顧廣圻  
後序何寓庸堂所作顧君小傳藏書言之尙略吾徵諸所  
聞則長洲張先生思孝每稱近世藏書當數義門爲吾郡

一宗又稱君簿錄之學深造義門堂奧有類繼別攷鑿密而包羅廣出同時諸家上君歿家中落書佚出前卅年許吾從兄之達頗收得咸精確祕善無一俗本 錢大昕顧桐井墓誌銘君諱應昌殿舍字也桐井號也行第五又自號五癡先世自金陵遷吳五傳至國本明季貢生私諡貞孝先生者君之高祖也國學生階升其考也君生於雍正乙卯卒年六十有二有子二人長蕤而繁季也昌熾案蕤卽南雅先生先生達而家書盡散矣 士禮居藏書題跋記會稽三賦余所見三本一得諸顧八愚家一見諸顧五癡家八愚五癡爲昆仲 又白氏文集跋東城顧五癡家藏書甚富知余好之篤雖一鱗片甲亦自侈爲奇寶因出

破書一束指示余曰此絳雲餘燼也余開卷知是宋刻白氏文集述古堂中物也卷中燒痕尙在通冊又似經水溼天下奇書何其厄於水火之甚邪 昌熾案潛研銘五癡名應昌而何堂所作傳稱步巖二子曰磧應麟牴牾不合豈磧一名應昌邪又案蕤翁呂衡州集跋云余得諸顧五癡家又云得諸碧鳳坊顧氏是五癡嘗居碧鳳坊矣其跋湘山野錄乃云混堂巷顧五癡家有毛斧季校本蓋五癡先居碧鳳坊後遷混堂巷今其後裔猶居舊宅余在海甯查翼甫孝廉處見舊鈔翠寒集每葉欄外有善耕顧氏文房六字前有顧肇聲讀書記肇聲名榿官鹽山令改浦城沈冠雲有送顧浦城序見果堂集又有榿父顧方水墓表

云君諱濡字方水祖國本縣學生據潛研銘國本三傳至  
階升則方水爲其從父而肇聲昆弟行也

藏書紀事詩卷四終

